

兩浙輶軒續錄

兩浙輶軒續錄卷三十三目

錢福昌 朱蘭 孫義 龔肇祚 陸元煊

金安瀾 徐有壬 徐林春 陶澐 余坤

許正綬 方騰 黃崇慶 汪隆耀 陳紹曾

葛慶曾 徐鼎 羊宗道 查星路 王煥然

張邦樞 金應麟 盛福鍾 陳瑞增 袁俞粉

吳德輿 蔡傳謹 陸元模 馬國棠 崔廷琛

朱爲燮 陸憲曾 郭紹泰 朱翊青 章萃

姚寔 沈碩 屠可標 馮汝霆 宋聲震

陸灝 王文燦 陳錫藻 郭承周 鮑淦

王錫享 張錫魁 潘恭壽 善能 沈玉琪

楊良熙 邵懿辰 許元燮 馬誦芬 朱善旂

莫寅昇 陳鍾祥 王玉文 俞興瑞 廷玉

金洪 羊宗祐 金澍本 陳朝棟 姚伊憲

嚴塘 許延敬 吳垣 周士瀛 王鐘

沈愛蓮 嚴人壽 史璜 徐振魚 蔡載福

張定閏 商曰理 程世森 李英 孫壽熙

孫寅 沈鴻謨 顧逸 林兆豐 盧椿

沈玉書 陳爾猷 傅傳 王九疇 王家齊

周翰生 黃漢 陶慶颺 陶慶怡 章啟昆

謝文連 史善長 陸莖 陳彖 俞勤堯

胡起銜 王壽徵 畢兆淇 伍珣

兩浙輶軒續錄卷三十三

督學使者潘衍桐訂

錢福昌

原名攀龍字超衢號辰田平湖人道光己丑一甲二名進士官至內閣侍讀學士

縣志福昌幼年穎悟篤志於學既成進士充江西副考官任廣西河南學政按試各屬約束書吏儉從甚嚴竝飭校官申解月課卷以憑核實試既竣集士之文行兼優者來署面試優給膏火以爲獎勵士習大振

劍花

干將出匣銳橫空虎吼龍鳴一掌中
霹靂開時光閃爍芙蓉
淬處影玲瓏一匳秋水鋒寒日三尺
神鉞氣貫虹耿耿元精
會切玉豐城猶自說英雄

朱

蘭

字久香號耐庵文治子餘姚人道光己丑一甲三名進士官至內閣學士著補讀室詩集

家傳略公受知

宣廟

嘗借許文恪戴文節入

內賦詩

上出扇命書之

宣諭

朝臣朱某非獨學問好人品亦好立朝侃侃風采儼然與倭文端曾文正呂文節諸公最心契性方鯁不喜俗

學惟以學契虧務實踐詔子弟最後督院學曾文正方
以使相駐安慶迎謂公曰盜賊之起起於人心人心之
變士習為之非公孰能救正之公亦自謂職司文字人

才為國家元氣以人事
君之義蓋不敢不勉也

孫德祖曰咸豐中先生掌教蕺山書院德祖以童子受
知著門籍同治丁卯又與先生季子衍緒同舉於鄉益
荷引迪先生平素訓士每謂心即天也欺心即欺天又
曰須憂勤惕厲常把此心捉住又曰義利交關最須勘
破德祖皆與聞之著有補讀室詩文集十六卷日記十
八卷羣籍撫問十二卷孟晉錄四卷師友言行錄五卷
校刊先友李次白左氏傳賈服注輯逸二十卷重訂周
蓮塘韻本釋要五卷黃梨洲邵二雲兩先生年譜各四
卷餘姚文藪若干卷生平以詩為餘事至於
抒寫性靈語真情摯亦足以得其大略也

示兒

識向風塵老身虞瘴厲侵相磨非兩玉自守抵千金斬棘披
荆手臨深履薄心莫嗤吾老矣鳴鶴有同音

艮峰蓮塘葉帆小汀招與張菊潭給諫
修育陪朱和之

百梅 小飲卽席別諸同年

晨星慨寥落入座半同庚

菊潭葉帆與余皆庚申生

舊事懷師友深情若

弟兄遭時

恩莫報經亂道難行臨別交相贈升高懼滿盈

送方生望東

恭壽

禮闈下第南旋

知君必不作方干氣似驂騑得路寬歸讀古書須努力逢時容易濟時難

贈同年竇蘭泉侍御

壻

卽送其入都

天南奉

召未休兵爲試經綸健骨撐誰識敢言名御史仍如守寂老
諸生少隨仕宦通時務久歷風霜歷世情同輩幾人留碩果
相期康濟慰黎民

琴谿

青山紅樹足句留
百舌聲多不解愁
惟有琴谿橋下水
絕無人處咽寒流

下蔡阻風寄懷湘鄉使相

兩渡州來境空懷
季子居山川猶未改
仁讓竟何如風伯羈
舟楫支祁奪并廬
思君不相見寡過孰
箴余

題孫寄龕孝廉

德祖

詩草卽代東

詩巢追步古名流
小閱滄桑已十秋
下筆少年偏老境
高談塵世寡同儔
燭谿舊德芬堪誦
空谷遐心品自幽
他日訪醫東渡去
還期共放鏡湖舟

七十自述

莫嫌氣味太寒酸
回首家風本冷官
身沐

天恩蘇草木人思地望接鵬鸞年衰敢說匡時易祿厚愈防
塞責難疊荷

三朝文柄授薦賢未盡寸心丹

孫

義

字質爲號樸堂錢塘人道光己丑進上官福建仙游知縣

浙江忠義錄義出宰仙游有循聲邑有金石書院親臨督課士風一振詩有唐音客中感懷云乾坤高下鳥身世去來雲其曠致可想歸田後囊橐蕭然課徒自給咸豐辛酉城陷殉難

徽署有鐵鑊二相傳爲秦檜烹人鍋詩以紀之

上廣下銳形殊科云是姦檜烹人鍋口徑四尺深二尺歷七
百年苔花多射堂堂下存二器底無款識歲月記人疑委巷
無稽談史冊不書烹人事不知姦邪豺虎本性生三字冤獄
鍛鍊成和議一定九哥喜西湖豔說銷金名吁嗟乎鐵兮鐵
兮爾何不鑄施全刀一擊不中亦足豪爾幸不鑄佞人相長

跪墓前兀相向此閒南宋開祕書我今懷古空歛歛半壁江山安晏樂小朝廷似釜中魚

龔鞏

原名自珍字定盦仁和人道光己丑進士官禮部主事著定盦詩集

府志自珍古文辭奇崛深懿不可一世其為學靡書不覽喜與人辯駁雖小屈必旁徵博引以伸己說詩亦奇境獨闢不受羈縻著作等身晚宗大乘名其詩曰破戒草邵陽魏源謂其於經通公羊于史長西北輿地其文以六書小學為入門以周秦諸子為金鑠石為崖郭以朝章典故世情民隱為質幹則大略具是矣曹錕序略君生平著述等身出入於九經七緯諸子百家其文如上搗山巖空青珊瑚侈之施諸采色可備藏以煮之為鬱鬱之酒芬芳條達甘旨醕醑如郡國往往於山川得鼎彝古豔古香摩挲不去手如壤孔子宅壁中問有琴瑟鐘磬之聲移宮刻羽有招我由房之樂如投九重之淵探驪龍之頷下而獲其巨珠縱千金而不易匪一簞之可遺豈徒以妙色和聲美味好臭怡神而蕩魄哉

復堂日記定菴先生曠世逸才韻語多飛仙劍客之辭所謂餘事作詩人讀破戒草往往舌橋心死

夜讀番禺集書其尾

靈均出高陽萬古兩苗裔鬱鬱文詞宗芳馨聞上帝
奇士不可殺殺之成天神奇文不可讀讀之傷天民

棗花寺海棠下感春而作

詞流百輩花閒盡此是宣南掌故花大隱金門不歸去又來
蕭寺問年華

己亥雜詩 錄二

浩蕩離愁白日斜吟鞭東指卽天涯落紅不是無情物化作
春泥更護花

亦會橐筆侍

鑾坡午夜天風伴玉珂欲浣春衣仍護惜

乾清門外露痕多

猛憶

狂臚文獻耗中年亦是今生後起緣猛憶兒時心力異一鐙

紅接混茫前

陸元烺

字虹江海南甯人道光己丑進士官至江西布政使署巡撫

府志元烺官刑部主事留心獄獄大學士英和以承德府蒙古民人訟案改由都統審辦奏派司員元烺充其選平反極多出為鎮遠知府苗民大和播貴東道勦撫荔波營兵滋事獲巨魁而不累居民遷江西布政使褚寇犯江西元烺以德勝門外沙磧高與城齊慮不易守督士卒剴平而設礮臺於其上賊來攻果不得入城圍解署巡撫以勞成疾乞歸

禱雨用東坡次章傳道喜雨詩韻

井龍生日適逢雨漱暑稍蘇夏畦苦

道書六月十二為井龍王生日是日設壇得雨

未透所恨屏翳吝霑漑坐見沮洳漲塵土早禾雖已畢刈穫遲者醞花猶未吐更有青秧乍栽種盼澤急於檄馳羽籌車終

日忙水濱涓滴詎能蘊隆禦方看變黷雲布野薄晚依然漢
案戶旱嘆心慚職守乖禱祠禮準常雩古但使滂沱月驟離
未必桑榆晚無補曾吟惟祝走雷車炎赫無教縱火母苦衷
儻荷神默鑒億萬蒼黎不難撫屬省衡湘頗震驚潢池小醜
猶狂舞紛紛閭左半流亡豈獨嬰兒失哺乳孰挽天河洗兵
甲露布軍中傳吉語我疆幸未警風鶴西顧差堪慰
明主湖田比歲患淫潦

詔許蠲租幾萬畝難得今稀鴻雁敷風香飯甌雞鳴午誰道
驕陽損秋稼頓令委積虛倉庾軍國從來利轉漕閭閻何計
輸官府念此傍徨起中夜終賴雲行雨施普籲天無若二者
先轉歉爲豐止戈武

金安瀾

字荔坡號羸仙桐鄉人道光己丑進士官江蘇松江知府著怡雲廬詩鈔

姚寶儀序略年丈與先大人最莫逆生平著述頗富嘗
招寶儀督兩係課所作詩文必屬錄正其稿遂藏行篋
中因檢駢體文十六篇古今體詩百首出
資付梓題曰怡雲廬者誌年丈舊居也

蟲

晝伏夜動似黠鼠張湯斷獄網漏汝且歌且行東方來

郭舍人語

熙熙攘攘成昏市我孤汝眾不勝誅不然撲殺亦易耳勝之

不武不勝笑我佛達觀呼佛子主人被創不汝嗔憐汝長噓

短吸不畏潰腸死

用柏寢事

蟲乎蟲乎豈獨汝利口殺身盡如此

徐有壬

字鈞卿一字君青烏程人道光己丑進士官至江蘇巡撫在任殉難諡莊愍

戴望撰行狀公生而敦敏入歲解句股術初就傅攬族

譜得宋太學生贈修撰應鑣闔門死節事歎曰吾他日

當如此間者賦之父蚤卒依叔父儀部京師籍宛平成

進士由部曹授御史外任成縣龍茂兵備道署川臬嘗

匹馬入囑匪巢諭降之由兩廣鹽運使署廣東臬使開

釋頂凶數十百人授川臬應

詔密

五年上封事擢滇藩會京銅罷運請就廠鑄錢蘇民困咸豐

御書篤慶延齡匾額並拜銀緞之

命理湖湖南布政使禦賊圍至四旬毋憂歸奉

命理江南饒就授蘇撫慮都中糧匱請撥藩庫銀買米三十

萬石航海達京師以次年新漕扣抵又奏飭地方官遵

定例勿苛索加成完納十年三月江南大營潰以常州

兵多且團練足恃議并力守禦圖再振而總督何桂清

先棄城走張玉良兵潰至無錫請助守蘇州公以人言

內之四月十二日客軍開門降賊公集民兵巷戰刃出

于背死之子震翼妾施氏女姪姑殉焉奉

旨照巡撫例賜卹方事之亟也公弟至蘇州請攜子女出抗

聲曰吾終繼武修撰公矣遂及于難公為學宗程朱然

不尚空譚宦遊所至必訪求風土民情山川險要繪為

巨冊以便觀覽于算術最精任郎中時蒙

成皇帝垂詢諸法一一具答

諭旨嘉獎高麗使臣及英吉利人慕而求教悉為刊正其謬

皆悅服而去所著有弧矢細草割圓密率堆垛求積冬

至權度攷日食九服里差校正四畢術等書于文字必

求有用不

輕作也

緝雅堂詩話徐莊愍公著務民義齋算學七種兼用中

西法所詣至精咸豐十年蘇州不守遂以身殉子震翼

同死賊未破城之先人或謂公曰奚不令公子出城公

曰渠不願臣死君子死父忠孝盡矣今聞其言而悲之

觀幸生畏死之徒猶糞土也余課誦經諸生以
國朝疇人學行考命題竊謂疇人之術近加精密習兼西
法取備時用然致思過工或偏于情性執藝近巧易戾
于志趣先民矩矱有可攷求如王寅旭先生之高潔徐
莊愍公之忠節真可師也今
編公詩低徊往事可勝嗟歎

齋中讀書一首

孝標昔辨命流落多憤辭遭迴十年閒才地良可悲人生貴
達志富貴非我思仰觀蒼天雲舒卷任汝爲

徐林春

字新孚號夢園烏程人道光
己丑進士官江蘇贛榆知縣

秦始皇

姬宗天厭解齊盟大賈居奇計自嬴六國連雞亡寸土重關
扼險倚長城讀書要絕人閒種鑄錯空銷海內兵太息沙邱
歸不得蓬萊何處覓長生

陶

澐

字廉生會稽人道光己丑
進士署廣東惠州知府

孫德祖曰先生由詞林應諫垣改直州牧分發廣東
旋升知府歷署韶州惠州府事除暴安良政聲卓著

泣蛾眉

有歌者自言曾祖會督兩廣家資籍沒父母早喪遂流落山左聞之慨然爲作長歌以紀之

醴泉有源芝有根美人生小出朱門朱門四十年前事開府
珠江檠戟尊一旦金章委黃土朱門轉眼成蓬戶昔日擎爲
掌上珠今朝飄作泥中絮美人爲我進一觴欲進不進神傍
徨琵琶幽怨歌聲苦誰閔王孫泣路旁路旁低唱聲聲咽樽
前細聽心如結一言爲告美人知千古傳人觀晚節君不見
蓮出泥中花自清珠投暗室夜光明眼前淪落焉能挽慎保
千金勿自輕

余

坤

字小坡諸暨人道光己丑進士官四川雅州知府著寓庸室詩藁

秦細業日時流以粗硬爲昌黎繁縟爲義山皆不足與
于斯事先生詩從二家出而遺貌取神孤行絕迹是善
學古
人者

感興

星芒一夕鬪機槍長想驚輦出塞聲烏壘已開都護府燉煌
猶駐貳師兵戰雲晨偃雕旗重候火宵傳牧馬驚差喜條支
諸屬國大軍深入解歡迎

皇情憑怒振天戈命將臨軒劍佩摩十乘元戎周吉甫三秦
轉運漢蕭何桑乾凍合銜枚度瀚海雲開躍馬過我欲軍前
獻饒吹天山分遣健兒歌

李大令畫雞歌

李侯落筆不肯俗恣意精能脫凡熟禿毫寫作羣雞圖翹尾
蒙茸神理足坡陀犖确怪石蹲皴皮慘裂頑蘚痕叢荆撼撼
細草平傾耳如有秋蟲聲一雞覓蟲氣專鷺注目草閒若有
伺一雞頰啄尻益高注坡疑欲追逋逃一雞據地冥按亟奮

距爬羅勢盤辟刷苔抉薛聽有聲如向荒區有誅責其餘意
態皆窮微或拳而瞑或靜嬉或思上樹待鼓翅坐中眙目相
駭疑斂身稍伏決將起形未脫紙神已離捫幅久視歎工妙
卻坐斂手生嗟咨荒齋十日閉秋雨長夜昏鐙殊厭苦頗思
製漏遠公法未信譚元處宗語安得爾雞眞發聲破空絕叫
天風生世閒吟嚙一時息坐見海日懸東楹啁啾伏雌皆可
烹

駿馬行

壤雲壓壘邊氛惡碧眼愁胡夜吹角營門有馬鳴蕭梢聲激
天風動寥廓名駒蛻齒才幾年筋骨遒壯精神全頗聞太一
況天驥或恐來自渥洼邊誤被拘絆伏楸檉夜風蕭瑟吹短
檐忍飢瞪立不可瞑龍氣憤動拳毛顛每聞鼓角雙耳直頓

韁哀蹴嘶秋煙都護將軍善相馬按圖索駿恨駿寡買骨干
金徧域中躡雲萬騎來麾下將軍高坐動清矚耀目驪黃轉
顰蹙貴人豈耐反覆看隨意指揮付圉僕萬蹏雲捲風輪旋
標別驥驚須臾閒坐中欠伸駿馬至材官矚目來轡牽歎沫
嘶騰忤呵叱將軍頤動微作色應聲轟逐風雨來萬袂齊麾
晝曛黑馬聞駛駝還長鳴將軍貴人且莫嗔貴人雅擅九方
號廐中上駟皆無倫麤材宜伏鹽車去莫累將軍相馬名

書感

白衣蒼狗看雲生未許閒眸測世情近鼠孤鵠應被嚇依人
鳴雁亦同烹崔瞻別室呼名士謝奕移樽得老兵朔與侏儒
同索米偶殊脩短敢相輕

與友人夜飲

靜觀人事宜長醉舉白相浮莫遣停夜半酒深悲壯極短衣

升屋看長星

許正綬

字齋生上虞人道光己丑進士官

秦細業序略湖州學舍舊有叢桂堂先生改署

重桂因自號重桂堂主人其詩雅近蘇陸二家

汪曰楨跋略先生以名進士需次縣令自請改授校官

先後兩蒞湖庠垂二十年訓士有法重設經義治事兩

齋講授不輟寒暑嘗編

國朝兩浙校官詩錄錄板行世生平所著詩文直抒胃臆

質樸淵茂

無愧作者

建蒼山

嚴郡上游水注自新安江建蒼伸左臂障之勢乃降其上神

靈棲其下蛟龍宅廟貌峙巖阿精爽鎮川澤州人復好事餘

技窮雕搜垣廊繚以曲亭臺翼而脩高坡厯逶迤絕頂開高

朗平楚蔚然深羣峰環相向每逢花木發又遇履候嘉聯裳

步瀟灑提榼玩清華
颿影落尊前塔尖出林表
苔緣雨後蝸藤挂風中鳥
俯仰愜幽賞慷慨有餘思
古來名下士不招山靈嗤
吾輩實嬉游酒食徒徵逐
化素已爲緇還珠僅畱櫝
臨流急洗耳披雲使盪胸
不受移文勒庶免俗駕從
谿澗擷蘭蘅齋廚供菊杞
我欲贈美人南北雙峰裏

仇池鳴

移來萬古仇池穴
步上層巖絕壁梯
三月曉煙鋪麥隴
一江春水接蘭谿
曾藏邱壑詩堪畫
夢入雲天路欲迷
呼吸縱難通帝坐
擬邀謝眺其攀躋

題歸雲庵修禊圖

道場山畔何山麓
收拾煙雲尺幅閒
春禊那如秋禊爽
歸雲總比出雲閒
竹林雅集同千古

圖共七人

苔上風流見一斑
笑我

薄游催雨返幾時重與叩禪關

方

隲

字玉裁號雲泉錢塘諸生
候選同知著疏影庵詩鈔

杭郡詩三輯雲泉善楷法尤嗜古籍宋槧元鈔丹黃靡
倦顏其室曰疏影庵集石帚詞爲聯以寄意云象筆寫
箋角修花譜綠香紅舞宜有詞仙室無纖塵鑪香茗椀
雖城市若深山焉晚年得漁洋竹杖南澗詩瓢出入必
偕白髮朱顏逍遙物外咸豐戊午元旦以微疾
瞑先一夕有白雲繞室歷久始散亦異徵云

題金杏樓孤山探梅圖

春來好風日一月久晴霽孤山隔高城美人渺天際萬梅自
開落誰結煙霞契韶光二月初小艇約同詣餘酸賸湖水草
綠墓門閉薦菊多鷗朋眠苔無鶴裔玉英已飄零空亭儘流
憩回憶甲辰年探梅有成例寫圖極蕭閒題句盡圓脆想見
卷中人蒙頭香雪蔽後游補前吟韻事輒心繫余亦澹蕩人
交從水雲締

五月七日高古民招遊天長寺席閒以翠螺杯勸飲用

唐人顧況重午訪邱丹韻

高三十五展重午城西寺幽若巖陽詩朋入座逞雄譚酒客
當筵矜大戶禪房一徑通柴扉螺杯遞到翠撲衣旃檀林悅
游蓬島伊蒲饌更進薝蔔客定昨自湖上歸梅雨已滿煙水
磯忘機祇有鷗鳥樂競渡不見彩幟飛環圖昨游湖上所見相期晴訪
藕花去浮碧軒中暑氣微

臘月十九日詣孤山蘇祠展祀

叢祠寂無人野梅開幾朵四圍山未醒睡穩髻鬟禪冷趣誰
與探靜境獨領可少焉朋簪盍笑語紛瓌瑳暝色催歸禽寒
日似留我卻羨蓀壁仙載僧同一舸尋詩入鷗汀搖搖煙淡
沲

黃崇慶

字會錫號小薌模孫錢塘諸生著琴趣軒吟稿

吳振械傳略小薌爲吾友薌泉哲嗣承兩世家學以詞賦見賞宗工辛卯秋試闈中得疾歸歿

南湖

試踏青鞵趁晚晴斜陽屋角閃微明林煙繞郭可數里漁笛
弄風時一聲畫裏水紋僧衲破吟邊草色翠匳平張家古寺
今寥寂惆悵狂歌白石生

汪隆燿

字虛中錢塘諸生著冬榮草堂詩集

周僖序略君詩藹然如春溫然如玉讀破萬卷而不以縱橫盡其才困名場四十年而不以窮愁抑鬱傷其氣張千里曰虛中先生雅澹平易以山水爲性命以朋友爲骨肉窮老無所遇怡如也

思歸曲用漁洋秋柳韻寄同社

自覩春光已斷魂隨春一棹到吳門山容早覺青於染草色
旋看綠有痕愁水愁風楊柳岸乍寒乍暖杏花村倦游譜得

思歸曲孰與尊前子細論

五十蹉跎兩鬢霜等閒拋卻舊迴塘吟聯白社詩藏袖畫憶
烏衣扇貯箱風雅儘堪誇婦孺竹林差喜削山王賞心樂事
空回首豪氣都歸曳練坊

漫天晴雪點征衣客路行來事事非流水悽迷萍迹散晨星
慘淡故人稀短長亭畔花爭豔風雨聲中鳥亂飛賸有詩筒
催急遞素心相賞莫相違

故鄉悵望劇堪憐記得湖光綠似煙孤館尋來鴻印爪長隄
坐處柳飛絲舊游縱好成陳境愁緒偏多況暮年婁水一般
同杳渺相思遙寄白雲邊

丹生旣歿貧無以葬不得已粥書歲事因哭以詩并示

其子

顓

困阮兼生死身名竟兩虛傳家無長物理骨有殘書淚灑丹
鉛裏魂傷檢點餘記曾典衣買并典衣裳更買書撫此重欷
歔

陳紹曾

字青巖仁和增生
著問字樓吟草

耐吟續譚青巖僑居德清經義深粹詩學亦佳曾于甲
戌春介武康孫曉墀廣文來棲里思執贄門下值子有
武林之行遂不果留贈子詩云尊酒無
緣陪北海瓣香有願拜南豐亦可感也

擬鄭守愚鷓鴣詩

日暮東風不住唳刺桐花裏好依棲經年懊惱衣空畫一路
鉤欄月又低秦女曲中春色老越王臺上暮煙迷行人惆悵
黃陵廟格磔聲聲混竹雞

葛慶曾

字墨卿號秋生仁和
增生著靜寄軒詩草

吳振械傳略秋生身材短小為詩文則意氣甚壯館于
橫河橋許氏最久偃蹇以卒其母同日亡貧無斂具賴

友人經紀之工詞與駢體文稿皆佚詩草四卷則其病中手鈔許君信臣以授余者也

題王尺魚振綱抱影集

辛夷花下絨匳唾春曉娉婷人小坐泥香重婉鬱金褰荀郎顧影悲無奈夢聽魚山梵唄來等閒繡佛悟蓮臺瞿騰鸚鵡新詩誦宛轉珍珠密字裁天女維摩鎮相伴一夕罡風忽吹散往日淒涼病茂陵而今錦瑟絃先斷環珮歸時月色昏風前長與酹詩魂慧因澗畔泉聲咽寒食梨花哭墓門

題郭頻伽磨老復丁庵圖

香鑪茗椀足生涯獨客無憀每憶家歲暮歸來風雪裏到門先自問梅花

秋日感懷

霜清木落幾經秋十載艱難志未酬身似飛仙常歷劫心如

寒女只工愁讀書悔被功名累仗劍思爲汗漫遊多少人閒
不平事一聲長嘯獨登樓

徐

鼎

字恭三號庚笙海甯廩貢著庚笙詩稿

海昌備志道光庚寅辛卯閒庚笙館可讀書齋彙鈔前人題詠金石之詩所采頗繁富蠅頭細書凡數冊後游閩中轉客湖北東陽程廉訪銓招之幕中未幾病卒廉訪歸其喪所著多散佚

胡忠簡公遺像硯歌爲呂幼心司馬榮作

高山空仰不可見片石居然識公面硯廣四寸長五寸繪像
精嚴神采炫此硯昔歸文懿公貯紫方館形模工明窗淨几
發歌嘯恍惚把臂相追從俛仰滄桑七百載題識分明終不
改司馬好古重搜羅陸賈裝輕歸碧海忠簡仕宋高宗朝著
春秋學勁節標手研麝月草封事聲價豈以千金高力排和
議訐謨遠盡逐忠良姦計恨五郎不獲抵黃龍唾手燕雲嗟

已晚公挈此硯趨炎州盧谿雅誼勤賡酬贈言十事感彌遠
編管免共夜郎流廿載風波幾漂泊姦相權尊格天閣南來
北使問安危成就公名亦長腳長腳既死公始生一朝轉徙
歸南衡硯留遺像古未有侍郎特筆摹忠貞乾淳以來人事
易公貌巍然神奕奕饒州召對屬空談覽物淒涼天水碧吁
嗟乎以石爲硯石不頑曾隨白簡鋤諸姦忠魂毅魄鬱千古
卽今屹立瀛壖神往還

羊宗道

字小峴海甯增生
著贊雪廬詩鈔

抗郡詩三輯小峴善畫山水
輒自題詩於上人兩參之

題畫

淼淼江天尺幅收休論楚尾更吳頭數峰晴翠煙中寺一蓬
斜陽水上樓雁外舟輕歸晚唱谿邊楓老醉高秋疏籬野屋

依稀是欲共閒鷗話夢游

查星路

字蘭國海甯增生
著梅詠軒詩稿

烈婦行

并序

族叔守白配朱氏十年得一子今春叔遘疾卒朱誓
以身從視殮既已潛以朱絲畢命星路高其志悲其
遇恐久而湮沒爲作此詩

凌霄之花附於貞松心比松堅不逐春風

解一春風初起百雨

迓之舉案相莊以奉盤匱

解二相從十年一貧蕭然篋中花鈿

爲君棄捐

解三君忽遠游五年居獨績麻紉絲以補不足

上翁衰膝下兒雛歲晏歸守且樂喁喁

解五君貧旣極君病斯

劇海情山恩中道阻絕

解六仰天悲號八口嗷嗷蓋棺視殮會

不崇朝

解七青山路遙黃泉路近烈婦之心如日耿耿

解八委身

相從誓堅始終畢命朱絲以勵臣忠九忠臣死義決絕如此

名炳旗常心垂青史十嗟彼烈婦獨無所言名隨身沒我心

煩冤十一天地可改此志不做作為詩歌以告當事十二

小窗即事

兀坐看斜日竹陰濃滿庭酒兵塵病退花韻逗詩靈落落實

難合冥冥常獨醒靜中人籟絕鳥語隔簾聽

王煥然

字斗樑餘杭廩貢官蕭山教諭

杭郡詩三輯斗樑既耕且讀忠厚傳家所居在苕谿之濱夏秋多盛漲害連杭嘉湖三郡嘗彈心隄堰以捍之

修築陡門以為常絕無倦色秉鐸建德時值旱災捐俸襄

振事載邑乘

赤松子歌

崑崙山勢何龍嵒琪花瑤草馨其中神仙遊戲妙神通噴雲

巽雨乘長風不遇穀城黃石公難於下邳尋遺蹤赤松子古
佐神農憑虛想像其猶龍歷盡蓬瀛西復東十洲三島眞玲
瓏晶瑩恍惚開瓊宮餐芝辟穀覩仙容非人間物陰重重龍
鱗百尺連天封餌赤松實香填曾攀赤松枝手扶筇鶴棲龜
伏地蒙茸堯時非與舜時蔥飛不到者俗塵紅我繼留侯從
所從偃佺道我遊層峰人寰睥睨境全空莫問人功與狗功
見機當早藏良弓赤松子欲喚夢夢仙凡路隔志誰同

張邦樞

字子鶴嘉興懷生著鶴齋存稿

黃錫蕃序略子鶴少聰穎喜讀書無他嗜好長益自奮著作極古奧淵博詩入唐人之室駢體更精

古詩

開匳見明鏡皎若列寒雪寒雪不可埽但覺清澈骨願將手
中鏡飛作天上月東走滄海西崑崙照人終古無圓缺

山行見月

山行不覺晚秋月挂村樹照見澗底泉明珠走無數愛月不
在滿看山不厭暮空翠落人衣踏徧山頭露驚起老猿眠嘯
入松林去

金應麟

字師淵號端齋嘉興人著端齋草

蔣槐序略先生性情閒逸學問淵深不慕寵榮惟甘
隱遁或蒔花種竹斗酒賦詩皆揮灑自如獨寫襟抱

雨中寫懷

鏡裏星星髮漸絲十年前事最相思南山蒼舊今無幾北海
襟期更數誰厭聽愁霖惟中酒懶爭殘劫廢敲碁衝泥忽報
兒書到喜見平原唱和詩

盛福鍾

字迦生秀水廩貢

就醫橫塘舟中作

十里橫塘酒一尊滿湖秋水苦吟身自憐病骨殊消瘦欲倩
名山替寫真

客窗夜詠

夜況清如此三更野柝長月來催覓句僮睡自司香花事因

春早鄉心與客忙遙知小兒女蘭片索先嘗

玉蘭盛開因憶
家中每年作辛

夷花片味
甚可人

陳瑞增

字祿卿秀
水諸生

耘庵詩話祿卿少好爲詩中年服賈常往來九
峰三泖閒興至輒事吟詠詩亦雅淡如其人

秋夜感作

客館涼生席鐙殘影不明暗蟲鳴敗壁冷雨滴深更歲月驚
烽火關河老戰爭故鄉消息斷悵望若爲情

袁俞粉

字白如嘉
善諸生

新州竹枝詞

游蹤三載住筠城文獻爭傳笏竹名我與此君同不俗年來

心迹總冰清

宋高宗時郡守黃濟以笏竹環植爲城因名筠城胡寅有文記之笏竹墟距城三十里

濤聲颯颯晚風涼萬丈蒼松挂夕陽三百年來留手澤至今

南國頌甘棠

邑東北衛古松爲明巡道吳廷舉所植世稱吳大夫松

亭前曾闢菱荷塘風入疏簾冉冉香莫怪人閒花易落須知

塵世有滄桑

菱荷亭在縣東五十步宋主簿譚宗改名冉香今廢

萬丈文光射斗樞梯高百步擬雲衢一時多少登瀛客可有

騰霄壯志無

百步梯在城北二里許上有文昌宮士人多結文社於此登瀛坊在縣西騰霄坊在縣北

吳德輿

字映秋嘉善人著鷗舫吟草

家傳略德輿幼失怙學賈以奉母嘗封股愈母疾爲人蘊藉工詩扁舟往來吳楚閒樂其山水明秀輒吟詠以

意寄

寒江夜泊

孤舟岑寂夜如何坐對殘釭凍筆呵無柰欲眠眠未穩一篷
霜月雁聲多

寒江夜行

冷雁遙空度江天雪乍晴月明漁火淡風峭客帆輕鐘打金
山寺雞鳴鐵甕城寒衾無夢到不盡故鄉情

蔡傳謹

字晚蓀嘉善人
著浣薇館吟草

家傳略先生青年績學歷遊秦晉吳楚閒足
迹幾半天下故其所作獨闢清空絕無依傍

讀楊忠愍公集

五姦十罪論非誣海內如公不可無未見冰山消日月先令
鐵案泣妻孥忠魂難補千秋恨義士空傳萬口呼仙籙荒唐
何處問可憐碧血灑春燕

陸元模

字定庵海鹽貢生

許仁杰曰君食貧力學授徒四十年遠近就正者屢常滿戶同邑沈文節炳垣其最著者也晚年益肆力于學著作甚富

兵燹棄佚

讀明史

生必如皋夔宇宙無完人死必如龍比古今鮮忠臣正士不惜死殺身以成仁死雖無高下總之非等倫吾觀明季時又難一例論豈乏敢諫士匡救死讜言豈乏敢戰將馳驟死沙塵忠義本天性臨危難顧身是其用意處不但名節完天心肯眷顧力能轉乾坤徒死亦何益志在圖國存勇哉于少保宗社賴以安壯哉楊兵部身死姦膽寒

馬國棠

字紀南石門人官兩淮鹽運司運判

縣志道光初年浙西大水國棠倡捐振米一萬七百石他如獨建接嬰所老人堂助書院田三十餘畝鄉里稱

之咸豐三年寇陷揚州國棠作絕命詞置硯匣下投水死事聞奉

旨賜卹襲雲騎尉祀忠義祠沈觀察輓之云此節爭千古當年活萬人蓋紀實也

道光紀元辭公舉孝廉方正詩

一從詩廢蓼莪篇回首兒時輒涕漣辜負當年詩禮訓徵車何敢嗣前賢

崔廷琛

字吟珊平湖增貢著譜華吟稿

吳仰賢序略吟珊先生以忠厚傳家見義必爲性喜豪飲善讀書酒後縱談古今得失事卓然有高鑒不屑屑以詩人鳴也

耘廬梅花行

玉堂仙吏梅花主名園手植三千樹巡檐日日耽清吟品題佳句作梅譜一時幫屐皆名流引觥飛爵相勸酬客醉不歸月初上美人欲來還自羞忽聞琤琮四壁起主人兀坐調綠

綺冰絃彈出三弄梅合座心情淡于水夜深恍遊羅浮巔師
雄奇遇仙乎仙醒來落月不知處迴風舞雪明筵前

朱爲變

字子調號理堂平湖附貢著傳石齋詩集

靈芬館詩話理堂蹈躋名場少所遇合以病歸里訪余于袁浦出近詩見示多牢落抑塞語雨齋題箋云舊游已減投入刺新著兼刪罵鬼文安國云花香著地秋無迹樹影搖窗月有聲寄曼生云廣厦置身呼負負名山退步悔遲遲旅人羈客讀之黯然

揚州感懷

江關蕭瑟庾蘭成僕僕飢驅赴客程舊事那堪春夢改新愁
猶似夜潮生江豚吹浪無相急秋燕銜泥亦自輕瓜步青山
明厯厯扁舟今日又蕪城

曉起偕江聽香

青郭頻伽

屠琴隲

張姓厓

迎煦溧

陽城東觀荷以荷風送香氣爲韻分得香字

竹簾汗如水侵曉先下牀呼童具湯沐及未升驕陽倚裳出門去快若輕鳬翔平橋支曲港鼻觀來妙香朝霞豔紅玉翠蓋敲明璫盈盈衣出水娥娥鏡新妝洗頭玉女笑皓腕甄妃攘蜻蜓千百飛飲此朝露涼客中百無樂聊爾容疏狂譬如一杯水亦得蘇渴羌我家東湖曲萬柄搖方塘結伴半鷗鷺睡穩雙鴛鴦扁舟儻落手散髮歌滄浪

陸憲會

字鯤溟元鉉子桐鄉諸生官山西解州州判著繕性居詩草

冷廬雜識鯤鯢溟姪秉性聰穎爲先伯父三石公所鍾愛需次畿垣詩名藉藉姪與余總角時共硯席每分題賦詩吟哦達旦壯歲嗟離郵筒寄詩酬和姪有懷余詩云讀過書應嫌我少刪餘詩尙比人佳又云百里知難屈俊賢天台杖策望如仙平生道學兼文藝不獨才名娘鄭處才筆清美可喜歲在丙午余讀禮家居姪亦奉諱南旋以所著詩草見示謝華敬秀造詣乃益精矣

易水弔荆軻

萬死無迴顧荆卿亦大難囊中利匕首眼底白衣冠熱血一朝灑悲風終古酸英雄成敗異不必咎燕丹

岳忠武王墓

沈沈鐵像跪孤墳一代賢姦眾目分只爲南軒能幹蠱青山寂寞曲將軍

郭紹泰

字蘋齋桐鄉人著寄閒小草

齋中夜詠

曲廊深夜寂霜溼一林煙竹碎階前月風闌樹裏天琴聲驚鳥夢花影伴人眠鐵馬寒敲玉鐙殘思悄然

鐵窩庵

竹裏山房午夢長茶煙吹雨綠陰涼一聲清磬鶴飛去時有松花點石牀

朱翊青

字梅叔烏程廩貢

冷廬雜識梅叔住震澤少擅才藻與時不偶感憤抑塞皆寓之于詩和人閨怨詩云苧蘿村裏如花女猶向谿頭自浣紗見者皆爲閨筆梅叔祇一女適張生幹齋遂依以老

五十自述

荒村風雪數歸鴉孤館淒涼閱歲華
悵望千秋還著我側身四海已無家
酒澆竹葉都成淚笑索檐梅賴有花
多謝孟公投轄意不教萍梗向天涯

章 萃

字挾庭號宏齋歸安諸生著宏齋詩草三卷

苦旱詞

一點雨一粒粟雨如珠米如玉
可憐有田皆化石老農日日縣
邦哭誰能鞭起熟眠龍手挽天
河傾萬斛

題禮芳禪樓

幽懷日以愜世事不相關花落一簾雪雲生半榻山詩僧共
晨夕清課約循環于此堪棲隱冥心無巧頑

姚

宴

字聖常號嬰齊歸安人廕生官刑部主事

舊雨集聖常爲秋農侍郎蒞闕淵博英敏發爲詞章往往跌宕自喜

題十柳山人田家圖卽送歸青浦

辭澱湖環萬頃波三閒水閣住如何青衫綠篋歸來晚應是
前身張志和

沈

碩

字季庭號二梅赤然季子德清諸生著繼聲吟稿

西湖四時竹枝詞三十首

錄六

隔林吹徧紙錢風雞黍家家墓祭同歸路偏提春榼小
杭俗掃墓用小榼盛祭品幾枝斜插映山紅

晴波潋灩夕陽殘麗景還從畫裏看一抹晚霞紅不斷桃花

開徧阮公灘

灘在湖中多桃花爲芸臺相國撫浙時所築杭人呼爲阮灘

宵移畫舫入明湖柔艣聲中起宿鳬橋外煙波隄外月湖光

清到一塵無

載酒來尋五柳居

酒肆名

嘉肴芳饌味何如獨誇宋嫂烹鮮法

醋炙銀鱗一尺魚

雁宿鴉啼欲暮天朔風吹水水生煙布帆一幅歸何處知是

雲林齋飯船

花舫輕盈載綺羅宜晴宜雨冶游多西湖風月渾無價銷盡

黃金水作鍋

屠可標

字同生鄞諸生

題王淑姑貞烈遺事

同住桃源洞口家謫分兩地飯胡麻合修天上君臣藥不礙

人閒姊妹花好事偏從金玦解此情誰唱玉鉤斜東南缺處
何時補鍊石心腸有女媧

馮汝霖

字廷雨號耳堂慈谿廩貢著循陔書屋吟稿

觀海衛城

萬里鯨波簇戰桅一城控制亦雄哉會聞充國移屯至終見
盧循跋浪來鏃鏑全埋荒壘恨角聲猶帶暮潮哀清時浪港
山前路落日荒煙賸戍臺

烏巖廟

祀張睢陽

殺賊能爲厲千秋毅魄强城空無鼠雀鄉僻有烝嘗短笛起
荒壘靈旗捲夕陽里儒談故事淚下欲沾裳

宋聲霖

字韻士奉化諸生著玲巖詩草

鐙市

丁女上天雲氣癡燭龍十丈紅玻璃銀花挂樹不肯落風力
搖折珊瑚枝彈丸脫手神珠撒丹竈鑪開融絳雪量來螢火
作星飛一綫金蛇向空掣天帝大笑雷公驚晴雲闌月月倒
行千影萬影不可辨但聞到處笙歌聲銅蚪沈沈夜傳盞光
壓廣場醉迷眼爭看小市百枝鐙何止中人十家產

夢花軒偕甯海鄔君蕉園夜話

小築園亭處士家尋常景物轉相誇絕無依傍當門樹略補
荒寒繞砌花人坐一鐙青隔幔詩題滿壁碧籠紗山林氣格
風塵老悃悵春來攬物華

湖西尙書橋晚歸

向晚疏煙寂寂青湖橋流水帶愁聽忽看夾道乘軒過補注
他時相鶴經

斷岸深藏柳樹中瓜皮小艇蕩輕風湖光綠到無情處卻讓斜陽水面紅

陸

灝號善泉山陰諸生著鄂不齋詩鈔

陸敦儒傳略先生七歲能詩博聞強記工句股音律之學皆有著述惜斃于焚事親以孝聞年十七執家政再從而下百餘口衣無常主門無異煙雍如也

雜感

北風吹凜冽夜半寒雞鳴膠喔若相警慷慨有餘情豈辭口舌勤所感在生平逆耳世不喜翻嫌多惡聲雄心勿輕擲保爾翰音名

春日漫興

荒徑絕無客幽居常掩關微曛成午睡小病得春閒魚樂不離水鳥飛多在山問誰作舟楫一爲濟時艱

題俞雅平昭武治譜

當時早識士元才
萬里雲程一鶴回
怪底宦囊清似水
滄浪亭畔濯纓來

眼看停雲暫出山
天風吹去忽吹還
巖棲尙有爲霖意
寄語柴桑莫掩關

舟行卽事

梅子黃時雨乍晴
輕橈載酒小谿行
流鶯喚起東山臥
且看白雲生未生

偶題

終朝鷺鴨鬧比鄰
試向西風一漉巾
醉後休嫌天地窄
雲山行腳又何人

題扇

幾摺春衫十斛塵被風吹作過江雲百錢太覺蒲葵賤暫爲
看山蕢與君

王文燦

字霞城號月汀山陰人

月夜舟行

刺船穿破萬重雲剛得帆輕日又曛宿樹鷗噉知月上孤村
犬吠覺宵分天垂曠野疑無路風弄微波尙有文爲屬榜人
休夜語寒潮畱取枕邊聞

秋海棠花

東坡昔日曾賦汝定惠新詩千載傳吾生流落在蕭寺此花
娟娟如當年微微月色上牆角依依酒夢猶春前何堪秋點
二十五判入愁心都可憐

陳錫藻

字小虞錫華弟蕭山廩貢江蘇候補知縣著有愚詩話十二卷

自遣

百事而今懶散便生涯
冷落卽神仙未能免俗多栽竹
生怕催租早賣田
相避幸無沽酒債
欲眠仗有看書緣
牀頭失笑空囊底
儘貯閒愁不貯錢

郭承周

字長原號起山諸暨人著思永堂稿

吳沅芷曰起山幼讀書日數千言長耽吟詠自漢魏逮國朝諸大家靡不窮源竟委涵茹雋腴故於詩尤工

讀史

蕭曹起刀筆相業故草草貞觀有慚德
王魏器亦小半山本經生官禮恣接討
侃侃萬言書動輒陳王道名實不相離
致用乃顛倒宋社坐糜爛下媿江陵老
中天不再逢皋夔迹如埽君子感世運
望古傷懷抱

憶家怡堂

兩浙輶軒續錄

卷三十三

陳錫華郭承周鮑金

五

八〇六

去歲送君日與君同送春今年春又至猶是未歸人

鮑

淦

號拙齋甯海人著

任蘭序略拙齋文翰秀韻天成得於家學者多所著
閒餘叢說勤補軒雜著皆言之有物非苟於措詞者
姚變序略拙齋以超逸之品寄蹤日下所遇不遂其所
學故發之於詩多俛仰身世之感而詞不據華意不求
詭所謂詩以言志也至五七言近體出入香山劍南雨
家而不徒襲其貌後之讀者當有以驗拙齋之學而悲
其志已

李國梁曰鮑子拙齋襟期磊落詩思清雋以窮益
工處困彌泰非日挾行卷伺候於公卿之門者

和馮佐清善政庵題壁原韻

竹裏藏庵古閒游興若何秋山無礙瘦嘉客不嫌多松老寒
雲挂苔新細雨過醉餘濡宿墨蝸篆試臨摩

懷人詩

劉郎才調本瑰奇紅雪山房數卷詩我亦北游畱小草幾時

同坐訂牙期

劉問奇

鴻飛待寄一緘書聞道文園抱病居可惜夢中不識路金輪

呪罷轉躊躇

柳荃士

九日遊巾子山

久識茲山好剛逢九日看客懷倍寥廓秋水正瀾漫綠酒香
開甕黃花瘦倚闌晚風吹短袂歸路送微寒

清江浦

書劍飄零事遠遊風霜此地尙勾留蕭疏秋柳孤亭暮浩渺
長江萬古流聞笛無端添客感翦鐙如夢足離憂淮陰昔日
垂竿處爲問荒臺尙在不

赤壁

休論割據孫曹事記得坡仙次第遊千古江山傳兩賦一年

風月屬三秋。灰飛煙滅人何在。物換星移迹尙留。欲按洞簫
吹一曲。恐驚元鶴落蘋洲。

王錫享

字德馨號可亭永康
歲貢著可亭詩草

五百灘行

舟行婺城西。一水平於砥。溯流風橫斜。浪紋細裁綺。詎柰灘
清淺。回環杳無倚。沙礫殊磷磷。石骨露齒齒。細若攢釘錐。密
若排鐵嘴。盤渦力把舵。曳牽不過咫。推後以挽前。顧此役於
彼。五百齊轟呼。謹聲亂人耳。相望指顧閒。勢抵幾百里。捧纜
兩岸奔。崛強猶未止。篙工波折勞。出險一舟喜。軋軋艣聲催
城頭暝煙起。

昨至金華渡。迴谿水如練。利涉假方舟。行似去絃箭。何爲石
參差。冲激勢未便。盤攔蛟龍伏。蹲踞虎豹變。灘光淺且清。直

欲凌波面行客色旣驚舟工神亦眩急篙探石罅把舵隨渦
旋牽者厲前茅推者竭後殿相將五百人肩纜敢言倦批卻
趁波流謹呼震雷電沙石妙遷移浪花亂飛濺篙子運神機
誰云殊不羨航舟至中流帆擁長風扇咿啞櫓聲催山林倏
隱見入險復出險幾若膺天眷就泊羣鷗翔告勞炊夕膳

張錫魁

字星岳
永嘉人

管夫人畫竹壁歌

風篁蕭灑煙梢密墨雲滃鬱楞伽室名迹曾經禪臘多至今
傳是仲姬筆想見夫人面壁時閒參玉版生幽思揜袖心游
淇水曲含毫神往瀟湘枝吳興況復稱佳耦丹青自結閨中
友不須俊偉羨驂驪古春抽出摻摻手吁嗟乎白雁飛來天
水寒王孫喚作秀才官鷗波今復東流逝猶見僧廊墨幾竿

潘恭壽

字履謙號帶銘仁和人道光辛卯解元官天台教諭

杭郡詩三輯帶銘幼承庭訓動循禮法嗜學尤篤辛卯領解監臨主司並稱為得人後大挑一等改教職訓迪

庠序具有矩矱

秋日郊行觀田家穫稻

田家日作苦四體畎畝勤及春早播種既夏勞紛紜溽暑不敢畏惟求暘雨均一朝遇旱澇終歲徒苦辛入口已無食尙苦催租頻蠲免或可遇困頓良未伸今年書大有禾稼已薦新我來陌上觀露積高如雲丁男事錢鏹負戴日未曛婦子通笑語相對殊欣欣雖然歲有秋粒米良可珍弗以今歲豐而忘往歲貧寶此顆粒粟活我億兆民重此倉箱穫慰我宸慮殷耕鑿洵可安作息會有因鼓腹徧郊野庶幾太古春

山西太原府榆次縣東雙村烈女趙二姑行

道光四年夏五月

詔旌烈女樹貞碣

綸音下逮東雙村從此芳魂終不沒烈女伊誰天水氏盈盈
十三當稚齒幽蘭芳蕊已含馨一點素心誰得似鄰家有虎
敢踰牆真宰欲訴愁穹蒼陰雲慘霧蔽白日請看頸濺星星
血血濺庭前草不青女兒性本剛於鐵父兮母兮心徬徨
天閭上叩昭幽光幾遭屈抑顯奇節

鸞章綽楔垂煌煌吁嗟乎

聖教所被迄有生童稚亦復大義明封阡表墓泉壤榮短歌

聊述貞女貞

善

能字雨人滿洲鑲紅旗人道光辛卯舉人

盛元曰雨人氏烏爾達同治閒由京乞假還旗倡建梅
青書院與子相助爲理教育入旗子弟妻馮氏未偕赴

同所首子賣錄

卷三十三

攝恭壽善能沈玉琪

三

京因殉辛酉之難

感舊

城郭依然耆舊亡
愴懷誰是魯靈光
殘生猶有飄零客
再造誰施補幹方
自壞長城冤道濟
死爲厲鬼痛睢陽
可憐江上師燬後
又作淒涼古戰場

沈玉琪

字佛華錢塘人道光辛卯舉人官國子監學正

杭郡詩三輯佛華與輔之觀察頤亭尙書念農司業爲同族昆季文名亦相伯仲罷職歸優游里門輒課二女經史靡不通曉閒爲韻語亦楚楚可觀

題文待詔秋山聽瀑圖

衡山畫筆如承旨
落手煙雲常滿紙
此圖著意寫秋山
渲染大成真可喜
遠峰飛翠延陂陀
幽草自綠山之阿
竹扉晝閉兩禽語
瀑響忽自窗中過
松陰冷浸茅檐角
萬壑流淙夏寒

玉白龍蜿蜒壁空飛清磬一聲天影綠鵲華秋色與此同畫
得神髓堪爭工何當更寫攜琴叟獨坐泉聲樹色中

楊良熙

字星伯號正庵錢塘人道光辛卯舉人

楊振鐸曰星伯好談術數之學占候王遁參以宅經葬
法考尋休咎大旨以陰陽相得者為宗迥超方伎俗流
游法華隲

意行忽無路四山暮靄合言渡獨木橋隔澗樹陰市波光瀉
寒玉喜無魚龍雜水盡見茅庵竹外露斷塔荷樵兩衲子梵
唄互相答

邵懿辰

字映垣號位西仁和人道光辛卯舉人官刑部員外郎在籍殉難贈道銜著半巖廬詩鈔

曾國藩撰墓志位西之學初以安谿李文章務先義理不事
侍郎為則擯斥近世漢學家言為文章務與上元梅曾
綽色繁聲以追時好官刑部入直軍機處與上元梅曾
亮伯言臨桂朱琦伯韓游處博覽典章其文益奧美盤
折性故懿直往往面折人短終以此取戾于世咸豐四
年坐濟甯防河無效吏議鐫級既罷歸則大覃思經籍

纂著尚書通義孝經通論詩古文若干卷飢餓圍城之中猶著禮經通論以十一年十二月朔日罵賊遇害

羅惇衍跋略咸豐元年

詔求人才潘文恭以位西與林文忠姚石甫並薦兵事與胡

旨召用以母老不出

潘祖蔭曰先生為軍機章京陝甘總督琦善以枉殺番

索被逮

詔軍機大臣與刑部會鞠諸章京及諸司多舉細故詰問先

生至出懷中問目十九條難之琦不能答粵事起遣大

學士賽尚阿視師先生為十不可之議請上之格不行

師果無功自是不見容至河工旋被劾去杭城陷死之

孫衣言曰別紙七言律三十首蓋位西

感事之作其云紫虛道人者寓言也

贈梅伯言南歸

戰國之士羣好游漆園仙吏傲獨不偶出貸粟監河侯嗒焉

隱凡夫何求漢士執經意酋酋子長足迹半九州海嶽奇觀

萬里收歸來金匱羅千秋一隱一宦稍不侔天遣二鳥鳴相

酬我識先生文所繇氣則腐史神莊叟非獨貌合強鑄鏤高

懷逸趣自可疇少日才名豈謬悠京居廿載拙比鳩黃門懷
槩聊淹留今竟翛然指故邱青谿舊宅鄰潮溝敬亭山居擬
探幽著書何必緣窮愁十載相從頗綢繆論文如水以石投
文章極境高岑樓泊乎上與神者謀庖丁目視無全牛墀落
秕穢養空浮行矣眾盲失離婁敬爲先生舉餞甌願壽而康
食忘憂好學爲福耄敢偷卮言曼衍不自休成唐一經手刊
修亦元亦史汎虛舟江水門前萬古流

送王子懷省親還歙

黃山拔地高切漢新安萬家矗天半并州城頭望白雲有客
思親淚如霰老親頭白愛山居飯有秔稻羹雞魚春雷筍菽
味絕殊比鄰富厚還勤渠土風素樸樂有餘頽齡肯復命舟
車雖不救還日倚閭長安冠蓋如雲閭金距狸膏鬬雞貌高

門懸薄無不到漏盡鐘鳴誰復覺希聞疏廣出都門那識陽
城勸忠孝君行掉頭不暫留倣裝明發逾蘆溝一江春水下
歸舟幾日還家滌廁牖看婦織作兒吟謳暮歸侍親晨出游
黃山雲海足底浮人生快意有如此何用功封萬戶侯

題吳仲雲先生輯詩圖

今古詩人一邱貉好音過耳良可哀丈夫雄豪貴特起往參
大雅之羣材黑黃蒼赤有本質天妙欲自人閒來誰云流風
日綺麗柴桑一出元音回子昂太白未高蹈刻鏤錦綵幾窮
哉試將蘇陸雜兩宋屹如巨人俯童孩砉然九奏洞庭樂世
閒百蟄喧春雷吾浙朱查衍詩派太鴻而下成陪臺爾來闐
絕又幾時湖山氣象皆低摧方伯勤勤揆國秀古賢早已鐫
鎔裁獨持北斗向斟酌一空萬馬區龍駘不使清詞失傳

更遣墜句揚幽壘覽觀作者百年內風雨變滅須臾纔文章
傳世豈足恃喟然物外窮胚胎名成揚馬亦安用公作霖雨
休徘徊他日相逢一尊酒錦囊坐對西湖開

滌生擢學士芝房有詩道其進官之速而勉以鄉先輩
風義其言甚美因和此篇贈滌生竝呈芝房

吾交天下士楚材特瑰秀畱水於地中洞庭最閎富湘山巖
秦赭憤發氣蒸餽金丹數夏賦九牧遜多又入坐意森沈萬
象欲籠覆行身類兀岸吐詞必龐厚莫不抱古編額額日討
究觀其所執持資育莫果鬪豈繫天所開今此賢古舊曾俟
才旣老負重勝末厖飛飛赤鳳皇天網適游殼幾日呼其曹
丹闕鞏神構鼎膏舉剛局并汲資堅贅高明來走趨轂暢輻
爭湊甘言善熏移妙質恐遷貿孫子陳古義丁嚶友聲奏臚

南莊車車集卷三
說鄉先生誠勉願塞副丈夫自植立本在畏屋漏事功勿意
行著述要心句流從固須矯亢驚慎毋狂時艱撥雲雷古處
返鵲轂庶見命世英衰圯一扶救

彭餓夫墓

人生百年甘蔗渣鐘鼓饌玉風中花條侯主父要同盡首陽
清風生蕨芽暨依故人共脫粟伯夷所樹天所祿仁者之粟
不可常我獨何爲害口腹嘯臺激嘯高雲天神游清都飽紫
煙行人空挾一車飯下馬孤墳二百年

翰臣書來道粵西土賊甚劇

嶺外何時換祝良探丸赤白太披猖賊如原燎嗟難撲官似
池魚恐見殃決疇潰癰如緩緩帶牛佩犢轉穰穰安谿故事
君宜勉一展龍馭埽陸梁

和宗滌甫正氣詩卽以天地有正氣爲韻

富貴如浮雲忠孝天植堅舍生取忠孝譬撥雲見天塵沙倏
變滅白日萬古懸雞鳴風雨晦斷此柔道牽

田單附王蠋太史有深意轉恃一蠋亡立主復齊地厥後歐
陽筆區死節死事一死賢於生善死尤不易

噫惟勝朝末舉古異科曰貞良日斬雍義烈滋奮有成仁固
無憾滅頂亦不咎孰倡砥風節而眾恥偷苟

君繫水木感重以桑梓敬桓桓葛將軍結纓斃得正異代同
堂席先後互輝映視此閣中人撤發未昏性

天下事可圖在直遂不畏千金與猛虎一鼓作之氣騷情耿
介慕易道陽剛貴殲波及時挽士其可不毅

許元燮

字春萃海甯人道光辛卯舉人著滄園閒吟

管庭芬曰春華少孤家酷貧賴寡母撫以成立性穎悟
作文如宿構境有所鬱則以酒釋之醉則面折人過故
交者益稀至其率
真處不可沒也

九日魚臺道中

風帆葉葉下滄浪極目晴空雁路長
百里峰巒如送客一方
雲水自成鄉
簞籠入市魚鰕賤
穉連畦餅餌香
買得雙螯
傾斗酒南陽湖上作重陽

馬誦芬

字乙藜石門人道光辛卯舉人著春暉堂詩藁

古梅歌

孤根蟠石榦撐鐵耐
受年年風與雪萬木如夢正殯然一枝
自春散芳烈昔年攜種孤山巔料峭丰神澹若仙
壽陽公主
凝妝罷彷彿半面暹
鮮妍水邊籬落吹香雨
紙帳銅瓶藏繡
戶何當橫笛一聲吹愁絕
月明照今古樹猶如此人難堪柳

枝搖落望江南陽回黍谷暖氣動梅占花先藥半酣君不見
宋相國文辭揮灑空回首又不見林處士風流闕寂今何有
羅浮路杳漫江鄉夢更殘惟有千齡雙老鶴長依庾嶺守天
寒

朱善旂

字大章號建卿平湖人道光辛卯順天舉人官國子監助教著敬吾心室詩稿

許乃普曰建卿為椒堂擢紳令子精訓詁鑒別鼎彝諸器又能世其家學一時好吉金家如陳頌南吳子必何子貞陳受卿皆折衷于建卿官國子助教垂二十年

齊侯疊歌追和先子作

有序

阮儀徵太傅於嘉慶甲戌得齊侯疊搨本寄先子屬
為攷釋先子於釋文後系七古一首是為齊侯疊首
唱追道光戊戌太傅索取先子向所釋文
善旂徧覓
不可得太傅乃自釋并作後歌有當年釋出詔夏否

之句今校甲戌詩知釋文卽在詩序中韶夏實已釋

出敬賦追和

憶昔甲戌侍京師獲見齊疊心好之其時先子官駕部十年前已編黼黻儀徵最後得此器奇文手搦郵書馳寒窗矻矻事銓釋仿古首唱齊疊詩節院和章來日下梓俯喬仰傳新詞其後又閱廿四載元老行將引疾時重來索取甲戌作父兮養疴正支頤小子檢點不可得走倅陳謝婉致辭後來桃李麗霞舉蒼籀點畫辨蛟螭陳給諫子苾吳方伯式芬論識董子貞辭無支老翁諦觀悟韶樂快意愈疾矜神奇復撫此疊再哦詠命曰後歌軒鬚眉小阮簡翰忽來召脫橐親揮聽呻呶庚戌之春赴書至公繼我公上騎箕小子楹書未能讀讎校編年方補遺甲戌舊作忽新得序文森列輝初曦

當年韶夏早釋出古義盡發無傳疑惟懼編詩不早刻塵封
高閣公不知九京當有起予歎傳示後人始無欺戊戌以來
釋者眾古文奇字爭毫釐對此初釋義精確恍如一畫開軒
羲包羅羣籍含萬有取之莫盡繭抽絲又如蘭亭得初揭百
變終難越範圍羣形如壺銘中兩得壘如遇挈壺兒

莫寅昇

原名與功字月鈞歸安人道光辛卯舉人

辛店題壁

繁聲無復響箏琶神女高唐夢亦賒纔過荏山風景別儂家

只種木棉花

辛店屬高唐種木棉花爲生故無歌者

陳鍾祥

字息帆自號亭山人山陰人貴州籍道光辛卯舉人官直隸趙州知州著依隱齋詩鈔

龔自珍曰息帆以弱冠舉省試游京師名動公卿篋中藏弄篇什甚富眾體悉備才思橫溢劉舍人所謂彈毫珠零落紙錦爛者也

宗稷辰曰十盪十決墨兵縱橫岳家槍不必盡用古法也五七律以才調勝樂府最爲入格一二寄託之篇尤闕詩

史
寄心盒詩話山陰陳息帆州牧少居黔入黔籍以教習知縣官於蜀奉使察木多山川風物盡寫入詩吾師姚石甫先生序之奉內諱後還浙癸丑值赭寇擾長江遂由海船攜家北上大吏以有草檄才屬以軍事署滄州牧頃官趙州聞其精心吏治撫卹殘民餘暇則喜賦詩與幕僚倡和詩凡十集中遇奇情奇景一吐其胸中之奇氣非尋常吟風弄月比也

廣元道中

秋色千山紅樹馬蹏一路出青雲鳥飛峽口影俱沒人入煙中語不聞半角寺樓村店合幾家流水小橋分鐘聲何處穿林杪無限詩情在夕曛

龐靖侯墓

隕星此地偏成讖落鳳坡前慘陣雲尙惜君才非百里豈知

國勢竟三分空山闌寂唳殘鳥古驛蒼涼駐夕曛天使臥龍
終入蜀不教犄角制曹軍

從軍行

誰道軍中行樂難饒歌錯雜到杯盤中秋月漫停杯問太白
星猶倚劒看西去虜酋方荷甲東來將相已彈冠凱音昨報
長圍解吏卒雷呼動地歡

秋風班馬正蕭蕭城上烏唳警昨宵將令不聞誅馬謖侯封
爭欲拜班超競將刀鋸嚴從脅試看弓鞬各在腰左右旋抽
方作好一軍河上且逍遙

湘君墓

黃葉秋雲鎖墓門江風瑟韻不堪論年年山上叢生竹長使
行人覓淚痕

重登岳陽樓

淚點蕭蕭斑竹林蒼梧雲黯接湘陰身微不敢憂天下自向

湖頭學朗吟

王玉文

字偉堂金華人道光辛卯舉人官於潛教諭

葉寶衡王公殉節紀略公少穎敏博極羣書尤通韜略選授於潛教諭明經術厲氣節士爭嚮學會寇氛逼東南公預籌戰守策著書十數萬言庚申春賊自廣德入公奉檄守東關賊不敢犯由閑道逼昌化公疾趨敗賊蘆嶺既而賊大隊犯于秋關守兵潰公率民城守力不支賊遂援城登公整冠帶北面再拜賦絕命詩自沈於泮池時咸豐十年六月初十日也

絕命詩

孫鏘鳴曰道光戊戌余與偉堂會於京師兩人即居相去不一里故往還尤密偉堂一目微白往時聽其議論實有不肯苟徇流俗者故能自立名義如此

當道惟爲肉食謀腐儒有策事難侔兵爭小利應非福劒奪

奇功豈易求徒使蒼生沿路哭竝無丹悃代天憂區區抱節
書生事奚計浮名萬古留

俞興瑞

字震軒海甯人道光辛卯優貢入旗官學教習省霞軒詩稿

海昌備志霞軒少有神童之目蕭山學官所藏書徧覽不遺甫成童文譽噪一時尤工駢體之作疾書不加點博瞻工麗古今體詩亦多古藻處儕間中執禮循謹未嘗自矜其才其卒也所知皆悼歎

慶忌塔

大風吼錢江惡濤涌如雪報仇雖不遂公子千古烈要離市
井無賴徒焚棄妻子嗟何愚作人鷹犬黠自豪我視其死輕
鴻毛膝可加頭可捽公子已死神猶活石池水立舞光怪鐵
棺苔繡纏筋骨闔廬終喪靈姑浮鴨夷老臣隨急流天道自
古好往復苦竹荒煙吳苑秋

倦遊

萬里關河壯志非十年塵土滿征衣平林落日鴉爭集古道
秋風馬不肥山色看殘吟眼冷天涯覓徧賞心稀誰能更唱
勞人曲無限蒼苔沒釣磯

靜坐

臨水茅齋三兩閒蒲團烏几閉門閒日移花影分濃淡風引
茶煙自往還漸聽吟蟲生暗壁忽來歸鳥點秋山利名畢竟
成何物擾擾黃塵徧九寰

獨坐吟

兀兀獨坐嘉晝長一心澄靜生天光斬絕情魔回眞陽浩然
之氣大且剛嚼咀道德窮文章深入幽邃揆毫芒忠臣孝子
涕淚滂鉅儒肅穆垂衣裳美人如花私語香豪客拔劒天茫
茫狐狸奇鬼森披猖神仙鸞鶴參翺翔青燐白草古戰場老

僧枯坐月滿廊一一在我几案旁仰天大笑酒滿觴下視俗

子如蚊蟲

廷

玉

字蘊之號溪巖別號石湖翁杭州駐防

文秀欽略溪巖好古嗜書工績事得其片羽者什襲藏之西湖佳山水登涉殆徧如明石窗雙就園成欽其品學所著有湖山補遺若干卷城西古蹟考尤竭平生心力結撰而成前列圖說并詳以古今稱謂之不同而總以不失傳者爲是

緝雅堂詩話溪巖姓巴爾達氏城西古蹟攷凡八卷成于咸豐初年年已七十有七書中閒附近人著述有爲它書所未見者足資采掇惜寫本僅存已佚其第五卷矣

鏡花吟

有序

蒙古陳氏家有古鏡一規半尺許背有銘已不能識

丙子季春左邊忽生暈如花磨之不滅明日生珠纍纍越日中挺鬚二十餘莖其珠環綴於杪臨風自動

隱隱有聲數日而沒或謂凡物於庚申日霑漬人血
久之遂有是異不足究詰也

塊然一物何弄奇攷諸臆氏今古疑寶質凝金象太極騰光
團圓欺瑤璃陳家藏鏡點深翠土痕暈斑花一枝小鈕波紋
類秦漢長宜子孫款滅漫狻猊蒲萄那足珍海馬燕雲錯綜
半摩挲古澤重徘徊花鬚花蒂如冰梅流鶯不轉春畱恨半
卷湘簾似月來流傳好事誇奇絕纖莖珠顆臨風結吉兆先
幾未可知浪傳曾漬庚申血

金

淇字又泉錢

養自然齋詩話又泉析產千金盡以購書中年後貧甚
性耿介不苟取與性嗜酒醉後輒誦離騷人以爲顛其
詩出入太白長吉廢煤敗楮拉雜書之咸
豐初年疾篤出稿二三尺呼其子盡焚之

蜃市曲

墨雲側捲生腥風飛濤夜射鯨魚紅木難火齊納百怪蒼天
下視雲濛濛小臣蟣蝨百事欠流淚欲爲斬馬劍此劍錚錚
眼中鐵海童海童日消滅

羊宗祐

字峴山
錢塘人

題王香雪

乃斌

雨中望皋亭寄懷詩

驚黃鴨綠細裁詩君是前身杜牧之憶得淺紅衫子薄香溫
茶熟曉寒時

金樹本

字麗生錢塘人著
友蓮新築散稿

杭部詩三輯麗生僑居禾郡不習帖括專嗜爲詩得一
舊印文曰杭州阿歡喜極恆佩之不去身後挈眷游楚
不復返

窮巷

聽雨獨自臥窮巷無人來閉門春草生好花猶未開忽聞幽

鳥嘯驚我午夢回春風動微寒胡蝶雙徘徊

陳朝棟

字鶴樓錢塘人著碧雲紅樹山房詩鈔

劍池

一劍憑空去全吳失霸才可憐池上月猶照石邊苔虎氣重泉閩魚腸萬古哀惟餘魯公字落葉滿林隈

姚伊憲

字尹爲號古芬仁和廩生

東軒吟社圖傳略古芬少孤力學以詞賦得名拙祕聘妍儔輩無過之者

花生日集胡書農學士敬樊桐館賦朱碧山銀槎

畫屏燭影照四筵銀河隱隱橫碧天一條貫星墮酒邊穿雲鏤月工雕鐫良工巧樣翻新鮮舛中屈曲非鉤聯篆文小字同蠶眠繫以至正歲未干上書碧山款印全重得十兩殊精堅當時竝稱虞揭賢以杯介壽相祝延浙西手藝天下先所

製非一得或偏是耶非耶并窮研對此放眼容狂顛若有人
兮衣蹠蹠彷彿招我停雲軒飄然上乘太乙蓮驅石手試秦
皇鞭天潢倒挽作酒泉宓如玉女來聯翩彈璫拊石調管絃
觥船四浮飛更前醉拍河鼓聲闐闐人生能飲且學仙豈必
鑿空談張騫尋常願假天孫錢莫待羽化驚雲煙乞漿況逢
乙酉年劫灰重話昆池填摩挲古質增流連酌斗請擬南山
篇杯乎與汝常周旋

送厲樊榭徵君栗主供交蘆庵

莫歎公無後詩人自不祧谿山聯舊社香火奉僧寮卷裏徵
君錄花前野客橈游仙三百首闔苑共魂招

題洪昉思填詞圖

小鬟低按玉參差自寫中郎絕妙詞腸斷嬋娟花月裏風流

諸老爲題詩

家世曾傳盾樣琴

先生爲忠宣公後人

才名豈僅託清吟而今井水能

歌處身後霓裳付賞音

百年零落斷紈存我輩牢愁共一尊帝子不來芳草暮汨羅

誰返屈原魂

嚴

塘字季馴仁

許淮祥曰季馴先生幼聰慧弱冠補博士弟子員旋食
餼有聲庠序閒與兄雲甸弟儀吉齊名時有天水三鳳
目之

照膽臺觀漢壽亭侯印

崑山玉荆山璞興廢存亡隨轉燭封侯肘後懸黃金旋銷旋
鑄如相尋嗚呼亭侯一玉印乃與西湖作寶鎮公名豈必藉
此傳卽此已足爲公信竊聞初失歸東吳後乃淪落鄱陽湖

湖神下令爭傳呼此印綬是公所紆爾曹魚龍好呵護毋使
文篆污泥塗一朝寶物爲世有千古鴻名垂不朽竭來再拜
請瞻視閃鑠神光驚戶牖不署荊州督不泐前將軍區區亭
侯鐫漢壽公心萬古畱在此印文吁嗟曹瞞首發難君臣一
心未忘漢

許延敬

字君修宗彥子仁和諸生官福
建邵武同知著華藏室詩鈔

莊仲方傳略許氏世居德清自布政公祖京寓杭君修
遂入仁和學爲弟子員援例以府同知分發福建樓邵
武同知事能以惠政逮民會邑苦水災斗米千錢邑令
暴卒士民合詞請攝縣事上官許之時方設廠平糶乃
嚴立程式使吏不能侵漁興修城垣以工代賑全活甚
衆未逾月以勞致疾卒士民入哭皆失聲歿後余女來
言聞俗好鬪凡殺致人者皆可以財賈免錫獨不
受曰我非好好名不敢負君親也其存心若此
羅以智墓碣銘許君延敬幼穎異復濡染其先人駕部
先生之學長益超厲試久不遇始仕于閩中攝邵武同
知凡兩載實心實力民信之會大水民請于大府乞借
君旣權縣事多方捍災民賴以生而君以勤死其可哀

也夫

胡程序略君修學秉家術廣游多聞發爲詩歌胥歸麗則

秋日田園雜興

最是田園好秋光不忍拋
候晴人曬穀未雨屋編茅
葉落寒蛩砌梁空老燕巢
晚來天愈爽涼月挂林梢

最是田園好秋光迴不同
稻舂新米白麻績夜鐙紅
霜信蒹葭外人煙橘柚中
石湖名句創我欲訪詩翁

家玉年兄

乃穀

招游理安集松顛閣晚由九谿十八澗

至月輪山看六和塔鐙分韻

清露潔天宇秋迴山容奇
林巒最上頭傑閣層雲披
伏檻一長眺萬山列屏帷
遠延螺髻翠近摘虬松枝
蒼煙出前嶺宿鳥投遙陂
日暮有餘興縱游任所之
谿澗何盤盤徑黑路不

夷牽裾陟高岡。予筇杖支浩浩臨大江。江清月上遲波濤。
猶震蕩。恰值潮回時。數鐙忽明滅。林樹乍卽離。俄頃萬象澈。
月淡鐙光欺倒影。入江水水動煙月。追偉哉此巨觀興窮力。
不遺三日足清游。幽情聊賦詩。

分洋旅夜

獨客俄驚旅雁鳴。沈沈巷柝已三更。鐙描衰草秋畱影。月擁
寒潮夜有聲。醉裏裁書多拙率。愁中得句不分明。薄游便覺
故鄉遠。燭冷香銷夢未成。

海潮行

海昌之海勢雖浩渺。實猶是大海之汭。風清日朗時。
望南岸羣山一路迤邐青。如點煙隱隱可見與北岸。
塔山大小尖山鳳凰望夫諸山。岑崟屏立者東江對。

峙潮自溟渤入於阻隘激起濤頭遠若匹練一出山口則駭浪橫飛洪涌澎湃最爲巨觀自此而西入錢江又遇龕赭二山中流一束故潮勢益怒吾杭江隄外近長平沙十餘里江潮皆趨南壘無足觀矣仲春下旬于役海昌觀潮隄上雷崩電激駭目盪心嘗謂地有潮汐猶天有日月日月應時潮汐亦應時陰陽氣機天地相同論潮者不一其說究以徐叔明高麗錄爲最確且最密也又郭濬海潮論云海潮自東起由近洋八山入江潮自西來由龕赭海門出相值在海昌南百里內泐騰洋溢江潮輕淡漂疾不敵海潮鹽重沈悍是以海潮挾江潮進龕赭入錢江抵嚴灘而退又盧肇云浙者折也取江潮出海曲折倒流也

然則海潮挾江潮而入龕赭江潮復敵海潮而出尖
山所謂回潮也是日所見未必卽郭氏所謂海江兩
潮相值處然亦極天下之偉觀矣

尖山青蒼峙雙闕潮頭蜿蜒初擁出纔過此闕便縱橫一綫
化爲萬龍白萬龍昂首舞晴雪海已無邊潮更闊驚蛇掣電
飛霹靂倒捲海水作壁立海水東流潮西向海不敵潮低首
讓潮頭如山高十丈驅山直走青冥上明如白虹天矯互長
隄疾如怒馬百萬馳駿蹶崑如銀山戴鼇六鼯羸勇如雪拳
搏象千狻猊天如鵬翼下垂暗無色雲如雁陣排空而捲飛
風如寒林虎嘯木欲折日如駿烏兔蝕慘不暉百尺東西塘
一刷與之齊雙峰龕赭壘一瞬追已遲神魂爲之盪目睛爲
之迷舌擣不得下身浮如無依掀天動地世無兩浩氣流行

在天壤南渡岳將軍航海文丞相一樣孤忠義憤死不平何
不銀濤雪浪相俯仰可讓員種英靈獨豪宕至今素車白馬
畱遺狀生平頗愛陳元龍滄洲笑傲開心曾抑塞磊落一洗
空日日來俯馮夷宮

吳垣

字薇峰號笠
江海甯廩生

春草

野火燒殘又一年東風吹處復芊緜飛花飛絮尋芳路宜雨
宜煙拾翠天一領布袍青有樣半江春水綠無邊長隄未許
香輪碾多少游人擬醉眠

周士瀛

字嘯湄海甯廩生
著織詩室詩稿

許淮祥曰嘯湄與先兄子震交
最善性穎異好爲詩古文辭

水花四詠同朱子藍水部作

種來湖面自成科弱蔓牽絲漾碧波作鏡任他漁婦照蕩舟
已有小娃歌關心水國生涯好轉眼秋風節物多最是晚涼
香散漫

香山詩菱風香散漫

白鷗如雪一雙過

菱

一年好景記江鄉漁笛聲中起夕蒼素豔最宜秋色淡疏香
忽弄晚風涼何人薄采過南澗落日相思望楚湘清韻絕無
塵點染只應敬薦水仙王

蘋

疏紅簇簇曉妝時荻葦相依弱不支卻襯斜陽寫圖畫祇愁
微雨溼胭脂冷禁風露秋容老醉臥江湖客夢遲莫道離披
工作態似伊辛苦有誰知

蓼

誰把懷人詩意摹遙看晴雪太模糊雁聲涼到不可聽鷺影
飛來渾欲逋風緊挾潮中夜響煙輕兼月半江鋪白頭夫婦
漁船老試問花應解妬無

蘆

王

鐘

字雪樓餘杭諸生

黃玉鋸曰雪樓嘗與書畫舫吟社如藕粉玉女瓊仙一聯體物之工一時莫與抗手

擬宋人夏日田家數九謠 集唐

一九至二九繁蟬動高柳三九二十七螢從枯樹出四九三十六筍抽過舊竹五九四十五汗滴禾下土六九五十四秋風昨夜至七九六十三稍知花簞寒八九七十二大暑去酷吏九九八十一夜堂吟蟋蟀

沈愛蓮

字遠香嘉興人著青珊盒詩稿小靈蘭偃館詩鈔

許仁杰曰遠香雅耽吟癖畱意鄉邦文獻嘗編續梅里詩輯十二卷以繼許燦蘅紫之書上元朱緒曾宰嘉興爲刊行之

雁水道中七夕

人滯雁湖頭迢迢此泊舟雲天淡遙夕風露感離愁月氣一

蓬白蟲聲兩岸秋蕭蕭疑是雨清夢繞蘆洲

曝書亭梅花盛開用雲衢韻時同人有重修之約詩以

堅之

敲斜老屋俯荒池芳信依然到北枝斷事尙思馮簡子披圖

空憶馬和之

亭已再圯道光丙戌馮太史雲伯補修植梅百本馬觀察伯泉屬武林徐兩作圖今二君皆歸

道山池屋就傾

百年故事傳三丙見拜竹詩上番春風又一

時後約莫忘香雪裏小樓同和落成詩

小樓添向牆角竹垞先生詞

嚴人壽

字伯年號松園秀水人著讀易堂初稿

鐘窗瑣話伯年所居回谿草堂爲鐫石翁讀書處伯年揚挖風騷結駕水聯吟社雅興正復不淺

新坊

扁舟駕一葉破曉入新坊殘月挂疏柳炊煙起野塘人喧晨

市集風順片帆張問訊前村路橋南長水長

新秋

徑僻門閒少客來
連宵風雨長莓苔
新涼惻惻迎秋至
牆角海棠花已開

史

璜

字印懷號史山嘉善諸生著史山詩二卷

李富孫序略史山酷嗜吟詩冲和澹雅不必矜才使氣能流露自然於鄉里之名物田家之樂事尤留心諮訪每見諸篇章以長言而歌詠之讀其詩可想見其農圃幽懷衡門高致矣

送吳三丈之維揚

解纜別秦谿
琴書手自攜
一帆春水遠
千里暮雲低
看月過瓜步
聽歌到竹西
梅花香滿嶺
好句待君題

徐振魚

字鯉門嘉善人有磨鏡室吟草

顧慶模序略君性沈靜操行不苟有狷者風

浴蠶詞

一簾晴旭嫩寒消
輭箔平鋪敞綺寮
怪底鄰家添笑語
春蠶生日是今朝

窄徑纔容幾樹桑
蠶娘心事費商量
典衣預買前村葉
生怕蠕蠕飼漸忙

黃鸝喚喚處
過三眠陌上風
薰煮蘭天記得微行泥滑滑
小姑分種到前川

蔡載福

號鹿賓石門人官詹事府主簿著荔香室詩存

家傳略先生性穎悟事繼母以孝聞喜與當時賢士大夫游又精畫學深得宋元人筆意

丙午九秋偕勞小田朱仲青及羽客俞杏苑游慧庵有

懷家硯香兄

選勝招遊已十年
精廬重過轉淒然

時硯兄已墓有宿草

拓窗話茗逢

新約聖壁尋詩感舊緣
滿院斜陽皆畫意
半林黃葉裊秋煙

鴻泥聚散知何事爲問同來葛稚川

檢所得蘭坻方先生真迹裝成爲家藏珍玩以詩識之

六法比青蓮詩禪卽畫禪

畫林新詠謂先生畫明秀空靈比之詩中太白

修來一枝

筆寫出萬山煙妙迹通靈爽清芬孰後先還愁石飛去珍重

顧廚傳

張定閏

字嘯夫平湖附貢著望雲樓草

縣志定閏童年畢讀十三經嘗集竹林詩社與兄子侍講金鏞都轉炳莖輩晨夕唱和爲士林佳話性喜書積卷累萬觀名人書畫立辨真贋

破寺

門掩竹迷徑殢鐘臥夕陽枯藤綠古塔老樹倚危牆簷角鴉爭宿佛臍鼠聚糧莊嚴同夢幻一例付滄桑

商曰理

字通甫桐鄉歲貢著秋蟲吟

曉泊新橋

臨平山下路歸客且停橈曉色迷秋浦人煙傍市橋遊情方
浩蕩昨夢已蕭條役役成何事空嗟兩鬢凋

程世森

字柳塘桐鄉廩生
著深柳讀書堂稿

桐谿詩述君績學能文所爲詩斷句逼
近漁洋五七律亦多緣情綺麗之作

永夜

旅館寒鐙夜不眠離心愁集五更前打窗落葉聲如雨人別

江南又一年

李

英

字聿齋桐鄉人
著秋樹樓小草

秋草

平蕪漠漠又經秋野燒西風極望愁廢隴煙荒人不到故關
霜落水空流踏殘黃葉疏林路冷到青烽古戍樓輸與牛羊

眠夕照一鞭瘦馬憶春遊

春去

春去園林花影殘東風回首思漫漫鳥聲忽斷雨聲至簾外
緣陰人倚闌

孫壽熙

字介眉歸安諸生

讀奕升伯菱湖紀事詩

吾鄉唐以前蕭蕭盡蘆荻九墩十三泉水斷土分析路少橋
梁通肆無米穀糴舟市賣魚鰕過午仍闕寂南宋聚居民寥
寥堪指摘地運轉前朝文明忽天錫蔣瑤洵名臣孫泰亦奇
績鴻儒與偉人邑乘載厯厯迄今五百年大廈如雲霧所慮
日趨華奢靡久目擊游幕走四方其志皆食覓縱有蠶絲利
經商或涓滴縱有絃歌聲讀書多立壁渺渺水雲鄉誰復得

自適惟願返樸淳頽風一洗滌

孫

寅

字辛齋長興人著率性小

龔麗正序略辛齋天才俊逸曠越時流壯歲薄舉子業畱心岐黃堪興諸術藉以濟世平居冲淡寡營與人無競其爲詩也不事矜奇不緣雕琢亦祇隨其性之所至曲暢其意所欲言而已

陰晴不常有感而作

陰晴正何常乍雨又乍止春晴故自佳春雨亦可喜蠟屐或鏗鏗素履安儿几我老還健步彼强已土委達者邈山河顯者歸逝水人生小天地往復陰晴耳

下箬寺懷古

寺爲陳武帝故宅在雉城東三里有銀杏檜樹相傳爲帝手植中有井帝生時井泉溢出香且温取以浴兒故名聖井

王氣今消下簪村重尋遺趾叩僧門叢篁喧鳥人蹤少古殿
蒙塵日色昏白下雄圖空帝業後庭花事問荒園參天鴨腳
凌雲檜遺迹還同一井存

沈鴻謨

字良範德清諸生
著不改樂齋詩稿

俞樾傳略沈君良範吾邑詩人也今春有以君詩見示
大都寫田園之風景敘里社之釣游旨淡而味長語工
而情逸有陶韋王孟諸賢風趣蓋君隱於醫不求聞達
習次浩然故其發於詩者如此至於感身世之屯遭悲
世運之遷變則又慷慨悲歌王處仲唾壺欲碎矣

擬移家山中

霽色蒼茫薄暮天數家茅屋白雲邊柳陰沽酒橋通市籬角
栽花竹引泉窗納遠山千嶂碧門臨流水半谿煙黃庭讀罷
焚香坐倦向松根枕石眠

贈超然

小樓岑寂訪詩人一枕華胥夢亦清山閣窗開晴翠滴谿橋
林暖午煙生野花似雪迷幽壑細茗含香解宿酲堪歎百年
同轉瞬流光如駛共誰爭

遊雲居山訪聖水寺

欲訪雲居寺蒼崖古木閒山深遊客少境靜老僧閒苔徑經
年合松扉竟日關幽棲塵不到坐聽澗潺湲

顧

逸

字君白號二鹿鄞諸
生著小亭林詩鈔

題鄭小樵畫梅冊

風竹筱淅淅草堂夢清絕丰格何脩脩曾向空山立窗虛拂
曉寒攬卷森孤潔超逸出風塵襟懷灑冰雪

流水繞孤村竹籬煙欲暝殘雪猶在林夜寒酒初醒疏簾浸
月痕遲遲橫瘦影好句忽飛來韻清風骨冷

威遠城觀海

海門天險控明州鐵塹雄威據上游獨立蒼茫初縱目放懷
今古一登樓銷殘氛禳羣蠻靖包納乾坤萬派流對此茫茫
身世感極天波浪使人愁

絕頂憑虛萬象開金枝翠蓋隱蓬萊蒼蒼曙色城頭落朗朗
長風天外來一路仙槎接牛斗半空蜃氣隱樓臺蛟門清晏
魚龍靜重譯來琛使節回

江城步月

欲往竟何之撫茲寒夜景攬衣出江城城頭霜柝緊平野起
孤煙明月上東嶺鐘動大江流機息千家靜朔風侵我肌微
覺衣裳冷信步履霜華蹋碎梅花影此身與物化澹然塵世
泯獨立不逢人領悟清寒境

林兆豐

字玉如慈谿人

緝雅堂詩話玉如先生好學深思潛德不曜所撰隸經
厝義益吾祭酒已刻入經編續編其周公稱王說力扶
鄭學斥肅說之淺陋持論甚正哲嗣晉霞明經沈酣羣
籍能守其學孫授經年少幼書余于庚寅年科試拔補
弟子員三世傳經可喜也已

孫君寄龜以志事聯榻慈湖見投二律賦此爲酬

仙樂奏琅琅誦之眞口香菁英包六籍文字溯三蒼漫以詞
章重應推學識長此才吾不信猶自善刀藏

盧

椿

字子懷鄞諸生著敬遺軒稿

縣志椿少孤貧母范撫之成立事所後母邱曲盡色養
與兄杰刻苦力學椿委稟壤異劉覽貶治尤熟於史治
詩古文極爲黃定文所賞生平寬厚蘊藉無疾言遽色
遠近皆稱長者旣老手不釋卷年八十卒卒前數日猶
爲文以贈行

寄家大兄

六月剛徂暑扁舟過浙東涼生三尺浪飽趁一帆風翻恨離家易誰憐作客窮祇應天際雁悵望未歸鴻

沈玉書

號素庭山陰廩生

題王梧石琴鶴行看子

獨鶴翛然鳴巖石一何泠泠泠琴七絃中有太古影仙人爾

王喬據梧調清軫

陳爾猷

號松巖蕭山人候選同知著吳山閒詠二卷詠史詩二卷

邨農

最是農家樂有餘邨人多半比鄰居一犁春雨耕黃犢十頃秋波釣白魚好竹行鞭穿土壁斷壺和葉挂蓬廬年來佳種分香稻旨酒新醅可蓄儲

傅傳

字臚仙諸暨人

王繼香曰君爲石波學士之孫與其婦孺人聞房唱和箸悟紅軒吟草劫後散佚

青亭

香界三千幾度經迎風點水舞娉婷生憎蠟戶千絲結襯出
鰕簾一角青芳徑月明春款款花房日午影亭亭不須更記
康伊號兩字諧聲又象形

王九疇

字洛東黃巖巖貢
著翠屏山人吟稿

家傳略洛東與兄廩生九齡並

負文名故時人有二難之稱

緝雅堂詩話徐氏父子貞定溫節二先生墓在百巖山

福海寺側碑爲朱子所書又題詩云道學傳千古東甌

說二徐其推挹如此地經喪亂墓不可得後阮文達公

蒐訪台州金石乃尋見之重爲書題而祠宇未復近壽

昌學官楊君友輩出貲爲唱始克成之余紀以詩云學

派傳安定詩篇紀紫陽墓田須特設祠屋得重昌門可

添松柏人都敬梓桑慚余采風使懷古意

深長因閱洛東詩有荒廢之句故記于此

委羽登高懷二徐先生

有山何必高登陟攜吾輩駕言縱元覽靈氣刷眉黛喜偕素
心人緬焉此瞻對有酒斟酌之弗慮吾道晦幽懷凌清秋素
脩景往代行行二徐宅寒蕪久荒廢惟畱道學句膏馥供霑
漑夕陽人乍歸一嘯發深慨

王家齊

字蘭汀金華人候選鹽大使著松石齋詩

家傳略家齊幼隨父夢庚任性聰慧嗜學精熟史事尤
諳唐代掌故新舊二書皆所諳習有郎官石柱題名考
御史臺題名考彙輯金華先賢著述刻冰
壺山館叢書同治年卒妻姚氏以身殉

秋懷雜詩

夙聞古人言窮愁資著書金門隱曼倩文園病相如著論寓
非有給札賦子虛豈其甘遺榮而乃慕世譽精神藉澡雪翰
墨成嬉娛文章耀鸞鳳鍾鼓悲鷓鴣微願疇見知念茲中脚
躋言解虞卿印終返班生廬

商聲鼓萬竅景物成蕭森
焱曦滌滌暑爽氣盈清襟
浥露掇秋卉棲林號暮禽
徒倚懷悲傷寂寥澄素心

急絃無懽聲猛政失人和
操切豈無補所傷固已多
詎以君子懷不聞勞者歌
私智矜刻覈上理蠲煩苛
流涕激悲風側耳太山阿
安得長者言坐令虎渡河

北里繁新聲齊庭集眾竿
客來攜瑤瑟所好諒已殊
抱瑟自歸來彈爲清夜娛
棲遲監門吏放浪山澤臞
豈以榮瘁情較量集苑枯
所憾解革帶失計東皋租
含情中悵悵返哺慚林鳥

送春農太史返都門

聞君行將歸軒眉大歡樂
念君當遠別躊躇中作惡
傾蓋初俄頃四隕秋庭籜
君爲萍蹤寄予被微官縛
祇竟溝水流東

西岐路各人生重意氣鐘響應牛鐸徒以形迹拘方柄捍圓
鑿走昔儒家流六籍窮糟粕廿載困蓬蒿衡華甘屈蠖結習
耽文字位置宜邱壑望古緬前修撫時懷民瘼一割用鉛刀
待借他山厝差同杜陵愚許身成落拓晚捧毛生檄願違迹
偶託濫竽眾僚底緘口闕譽諤世事方嬖姁予心疇忖度逐
鷺鴻謀梁戢羽禽避繳恥爲躍冶金所懼眾口鑠括囊且无
咎畏貽大言忤君少擅文采起家入芸閣中道遭沈淪輟鮒
困波涸壯氣顧如雲激昂中礪礪江湖望

魏闕微忱矢葵藿誰信高陽徒雅負匡時略匏懸予羈棲梗
泛子飄泊追逐飛雲龍合并偶干鎔子運成風斤予失鼻端
聖旅館一鐙孤坐對雨寂寞醪有妙理相將同斟酌飲酣
試縱目極望逮遼廓俗物何茫茫今古一邱貉泛論及世事

感觸淚交落我豈王郎流拔劍向地斫狂歌聊竝君唱和遞
醕酢壯懷一傾寫秀觀羣錯愕方今

邳治隆大化鼓橐鑰膏雨逮黔黎聲教震朔漠邊陲靖亭障
里井安耕穫神化得丹青宗臣勲爛若相業高房杜戰績雄
褒鄂大法小能廉百爾竝其恪

龍飛振初政

皇心懷朽索苞桑切

聖謨

宵旰懷履薄豈謂吏怠官全軀縻好爵默數廿年來聞見事
如昨樓船弛武備橫海肆鯨鰐雖云就羈縻豈不傷孱弱胡
仍安恬嬉而竟忘奮躍尺伍且虛籍窮閭多腴削潢池久跳
跟萑苻羣剽掠太平雖有象粉飾勞丹牖四方遠傳聞辭或

疑舛錯咫尺豈挂地鄒魯聞擊柝上相秉戎麾開府就山郭
意茲殄小醜傾海沃微燭何圖貔貅雄轉避蜂蠆螯捷書報
孫歆聞者大嗔噉客昨軍前來肆言笑袒膊偕君一傾耳拊
手交驚懼罪言阻上陳相顧中焦灼獬豸盈

堯廷風霜厲廉鍔朝陽待鳴鳳秋天望鷺鸕誰言肉食鄙爭
效屠門嚼且期曹劌來一戰勝長勺嗟子舊朝籍放逐久擯
卻歸儻荷

聖恩朝衫得再著夙知里門監狂生非落魄折檻希古直勿
效千夫諾贈言勸友行莊論異諧謔藉壯子行色端勝越華
橐薄糈營三金子懷非倚著囊粟臣朔飢久同空倉雀絜膳
醜蘭趺斷行悲棣萼年來身世感悲吟雜歌哭行視棄一官
輕若脫敝屣移居就羅浮稚川夙有約更聞壺嶠宮金銀耀

崖嶠何當乘巨舶浮家入虛鄴銖衣披雲裳霞漿注玉杓他
年蓬島書寄爾不死藥

遊新會何氏旋碧莊四首

爲園擅佳勝負郭地幽偏綠樹編垣密春流市屋圓晴光和
鳥語風景媚谿煙坐感勞人思端知靜者便

虛亭臨碧沼小坐偶觀魚印渚澄心久豪梁縱目初永懷任
公釣載誦漆園書無復臨淵羨平生結網疏

豔麗鬪奇葩春深覽物華祇園貝多葉海國佛桑花列澗青
松直穿籬笏竹斜著惟嵇狀肖持並陸裝誇

來憑攜蠟屐過異擁高軒並取禽魚樂都無市井喧琴樽何
點宅水竹辟疆園卽境資陶寫傾襟共笑言

周翰生

字步瀛號松甫
江山人

題柳陰飛燕圖

春風搖搖上柳枝柳眠未起柳不知空中拋下雙玉翦翦斷
煙痕嫩黃淺寒食梨花陌上春玳梁好夢落輕塵羞將太液
池中鏡偷照昭陽殿裏身芹泥不啄啄飛絮一片春愁寄何
處翩然飛去又飛回莫被長條牢綰住

黃

漢

字秋明號鶴樓永嘉人著囊雲草堂詩藁

縣志漢性孝友嗜學家貧傭書自給既而棄舉子業幕
游四方北歷山左平原南至江右湘南粵東所在輒按
閱志書見事涉區郡者筆記之久而成帙名曰區乘補
其在潮州郡幕一日偕同輩至長潭山亭弔明季殉節
林丹九孝廉賦詩紀其事又爲立祠
祀之其志趣如此所著有貓苑行世

春吟

芳草馬蹏驕嘶春隔柳條好山橫野水飛絮落晴橋青旂客
沽酒高樓人倚簫風前忽懷友吟思一爲遙

入山訪隱者

赤松今不見綠髮人已老難尋武陵桃且覓安期棗山中括
柏蒼年久圍十抱上有蛟龍蟠雪後看逾好遙聞金石聲先
生坐枯槁

南安郡

古郡萬山中巖關百粵通雲煙成瘴氣草木易秋風地瘠居
民儉城荒長吏窮往來多估客生計滿江蓬

南雄州

過嶺風光異南雄第一州羣山皆北向獨水忽西流花麗暗
藏市船輕高起樓去年征調地風鶴尙邊愁

秋夜坐雨

舊日草堂少乾處天涯一雨更淒清疏簾不卷溼鐙夢孤枕

無眠聞雁聲千里故人負期約百端幽恨過平生起來又檢陰符讀老去空懷寶劍名

陶慶颺

字念廣會稽諸生著二槐廬詩稿

陶濬宣曰先伯父念廣先生幼穎悟有神童之目家貧不能置書嘗假鈔人書日夜不輟叔祖永州公官內閣招之北行課諸弟讀從弟三人前後舉京兆先生自念少孤苦非科第亡以顯其親曾不獲一遇體本羸自此益以疲繭而提藥握素尚矻矻忘倦卒以不起瀕死猶伏枕泣作書悲不見母也卒年二十五未娶無子詩文稿旅次多散失今輯存一卷手鈔書焚後尚存易書詩三禮及文選十餘冊皆校勘精宋謹藏於家

梅山

高天蕩初霽遙山出新沐一櫂度湖塘新漲孕肥綠梅山高峩峩禪林紅一曲菜麥交平疇到門競青簇微風散朝嵐濃翠豁生目妙覺聞梅檀幽賞縈衿囑煙水自蒼蒼高詠清溪曲

躡級上崇殿勝地朗襟抱梅尉古音容卽之歎清妙挂冠謝
塵鞅見幾胡獨早逸躅幾千載高風猶未杳清奏岳下松潔
薦江中藻磨衲老煙霞韶節豐花鳥仙人足清福況復溪山
好道心空如何明瑟恣幽討

北山

白雲起天半忽失眼前松荒草無人徑斜陽遠寺鐘溪聲晴
轉壯山翠晚偏濃老衲歸何處林閒一笑逢

和吳梅村題士女圖十二首

錄二

漫言環珮千秋豔猶領君王一顧恩未必六宮無粉黛可憐
寂寂掩長門

出塞

十斛珍珠買一顰妝成金谷厭橫陳美人博得君前人不愧
風流石季倫

陞樓

夏日遣興

閉戶消長夏攤書倚石牀
名心緣病淡客味覺秋涼
風起動花影雨來聞草香
北窗容寄傲一枕過斜陽

京邸寄懷十三弟慶怡即題家書後

惆悵音書盼斷鴻
家山萬里白雲空
黃梅夜雨清明後
紅豆春雲水國中
久客光陰花鳥覺
依人況味弟兄同
遙知夜夜西堂夢
應繞長安紫陌東

陶慶怡

字子蘇號雅軒會稽諸生官廣東

王先謙撰墓誌君幼不好嬉戲入家塾終日端坐未嘗
離几席贈君自中歲久客不歸太夫人依母家為活貧
不能延師兄弟三人自相師友未幾贈君客死大梁兄
慶鸞游學京邸相繼逝君哀毀不能勝病幾殆勉起歸
筆為養以母老不能遠出前後館蕭山最久月必一歸
省以經紀兄喪入都遂應京兆試道光乙未取謄錄由
國史館議敘注官鹽課大使分省廣東條上鹽務利弊數
十事大吏深器異之檄攝雙恩場未三月卒於任君素

朝家掌故郡縣沿革河道牽徒海防關塞扼塞險阻與夫
民物戶口兵營之數隨得而默識之喜論時事下筆常
數千言性和易與人無所忤然戚友有失則侃侃爭之
不少假人亦服其誠每論事必折服人爲諸富人倡夫人
道光己酉越大水君貸粟以振餓人爲諸富人倡夫人
手製縣衣衣戚族寒苦者明年水益甚
甚振之益備鄉里帖然至今猶感之
緝雅堂詩話陶堰陶氏科第之盛甲于會稽君獨不遇
俛就閒曹猶不竟其用爲時惋惜哲嗣心雲舍人云君
詩經發散佚所輯存者大半少作迄咸豐辛亥止耳心
雲任采越郡詩基勤以時方校書吾粵距浙較遠郵遞
需時其最後見寄者全棄已編定
限于篇幅不能備錄深用歉仄也

元旦試筆

寂寂屠蘇酒東風淑氣舒新愁隨歲換舊業逐冬除日暖逢
春早家貧見客疏梅花初破蕾差得伴幽居

鏡湖

月黑冥冥萬木枯沙寒渺渺客舟孤一聲何處橫邨笛吹出

秋心滿鏡湖

梅花九章次高青邱韻

香雪亭亭傍玉臺風流端合手親栽水邊一樹偃煙冷竹外
三更帶月來人隔短籬尋綠萼烏偷芳蕊點蒼苔祇應羞作
餘花伴特向冰霜隊裏開

人間那得九疑仙縞袂相逢定宿綠水閣冷扶干片雪冰花
敲破一溪煙灞橋詩思寒山外詞客騷愁黃葉前此種祇宜
塵表有梅迴邨比大羅天

孤山曾記樹千頭冰玉乾坤夜不收茅屋橫參沈遠邃斷橋
打雪滯扁舟花中巢許別有態世外佳人不解愁天種孤香
輪我輩高情欲續老逋游

芭屨不惜印冰痕取次尋芳笑語溫明白乍醒梨院夢昏黃

錯認杏花邨寒通湘水詩人骨香冷瑤臺倩女魂大好燒鐙
留夜色盈盈解佩臥籬門

玉妃合住廣寒宮甯許羅浮好夢通臘底春光香小洩舊時
月色影全空人來衰柳斜陽外魂斷荒雞曉雨中不受東風
披灑福冰天著意護芳叢

肝膽清新本絕塵品題端擬古皇人詩仙合以花爲偶香國
原來雪作春索笑不辭皴玉冷狂吟應許引杯頻嫌山蕭瑟
冰容瘦轉覺煙霞氣味真

疏影還宜水竹依斑斑古幹麗新輝霜封大地千花歇月冷
空山一鶴飛甯畏寒宵生意嬾自憐高格賞音稀誰開玉照
堂千笏留得癯仙不放歸

半樹瓊姿背夕陽疏煙爲帳水爲鄉疑從仙國三千界分得

人閒第一香孤嶺橫春雲補影小園掃雪夜鋤荒漫言歲晏
無儕偶籬角黃花也傲霜

寂寞寒心祇自知青禽唳破兩三枝花開花落無人伴江北
江南獨爾思明月最宜疏影下東風愁絕欲殘時聊爲仙客
添新譜敢與何郎共論詩

白塢洋舟夜聞笛

今朝早發過長塘菜花十里春風香夜歸機舟白塢洋青雲
卷出明月光舉頭正欲歌寥廓何處笛聲中夜作我耳久不
聞箏琶一洗胸中數日惡江頭人靜江水清此時不可無此
聲沿湖楓柳一萬樹高風吹動何泠泠遙鐙明滅出古寺寂
無人語聞鐘鳴榜人苦請振歸舵其下恐觸蛟龍聽

呈杜尺莊先生

附

先生小隱傍雲門，名世文章老去尊。
大好溪山豐雪月，長留詩卷壽乾坤。
紅酣竹屋春鐙酒，香沁梅花詞客魂。
慚愧撫塵交契久，買絲我欲繡平原。

送友人之閩時甫自嶺南至

十年蓬轉各東西，纔得逢君是路歧。
握手不堪成遠別，浪游何處許重期。
春風送客無鴻雁，南國聞蟬熟荔枝。
瘴雨蠻煙人寂寂，誰憐匹馬又天涯。

夜過蕭山

歸颿猶帶浙江潮，暗數郵籤破寂寥。
一櫂秋湖搖客夢，五更楓葉雨瀟瀟。

曹山紀勝四首 錄二

水石洞

寒到空山氣倍清石門豁險古蘿橫崖高日月行天速夜靜
魚龍出水鳴寂寂危樓銜倒景蕭蕭落木聚秋聲先公一去
空巖冷斷額猶存石簣名

中有石簣山房爲
先文簡公讀書處

旱石洞

塵風吹不到蘿門層岫迴岑別有邨世外煙霞新歲月洞中
花竹古乾坤秋深紅樹酣巖氣雨過青谿長瀑痕咫尺仙鄉
人不見何須絕境問桃源

訪友

訪客不知遠刺舟梅市東到門方落日有客坐春風相契形
骸外忘言尊酒中平生知己感聊以慰途窮

上虞江舟夜

娟娟月東出素景含中流冷風動寥廓微雲淡不收言尋戴

公宅開颿虞江頭獨往無與俱對酒生慙憂疏林有春色夏
苗交平疇於茲感物變大化浩難留前面曹娥水清風長悠
悠

游剡中桃源觀

春風如有意送我入前林古觀香煙冷仙壇歲月深遠山明
晚翠疏磬定人心依舊桃花發劉郎何處尋

三界

古始甯縣治東晉時中原人物多遷隱於此今分隸會稽上虞嵎三邑故有此名

東晉風流盡高人孰繼蹤地爲今巨鎮邑是古雄封南北連
三縣蒼茫合四峯

字書四山爲嵎

千秋戴公水鐙火夜溶溶

八月杪偕十六弟

錫恩

自杭州歸道出蕭山

短劒輕裾作壯游歸途猶共說杭州夢回鷺嶺三更月人戀
湘湖一半秋夜雨疏鐙移白舫曉風長蘧露紅樓計程鄉井

無多路如此風光合少留

送族子荆山之嚴州

琴書安穩壓扁舟一路桐江盡勝游
白滿蘆花紅滿樹不應客裏更悲秋

登高

一望秋無際西風吹草淒雲連寒日動
天入暮山低江闊斷帆影林深聞鳥嘯
登高無限意歸路晚煙迷

送安軒海琴兩弟計偕入都

著鞭終讓祖生先送客西風倍自憐
不第反添離別恨無才敢怨論衡偏
文章坡穎歸詞苑京洛機雲正少年
今日河梁重攜手有人爭目孝廉船

輕裘快馬指燕雲壓擔琴書未是貧
十里雞聲荒驛雨六街

柳色

禁城春闕山壯氣才人占兄弟情懷客路真此去好承

仙掖直清時況復重詞臣

章啟昆

字同卿會稽諸生著
雲葉山房詩藁一卷

襄城旅店題壁

作客偏逢搖落時一鞭經過意遲遲蒼煙落日襄城縣古木
寒鴉考叔祠茅店晨雞誰起舞故人夜雨此題詩

店壁有黃
今樵阻雨

詩頻年行役真無謂搔首空憐鬢欲絲

辛酉九日登大伾山追念家理齋兄庚戌九日游此見

懷詩有異鄉兄弟猶難聚句迄今十二年矣愴懷存

沒情見乎詞

古寺玲瓏近翠微我來登眺趁斜暉白雲滿徑野花落清磬

一聲孤雁飛九日尊前多感舊十年泉下苦思歸家兄旅異

鄉兄弟今無復獨把茱萸淚滿衣

謝文連

字寶巖號退庵會稽人官湖北鄖陽通判著楚游草一卷玉壺冰全草一卷

陶潛宣曰君官鄖陽有政聲歷權各州縣捕獲七省教匪頭目論功擢知府以三齡喪父依母為活至是乞養歸不復出自言詩以陶寫性情信筆揮灑未嘗修飾也

秋日書懷

時乞養甫歸

鑑湖東去耶溪曲家住城南舊草堂疊石未忘邱壑意栽花還憶少年場閒中歲月消容易宦後情懷費較量何處蟬聲吹入耳數行疏柳倚斜陽

炎涼人事幾回更又聽秋風落葉聲乍啟紅箋雙鯉豔初生新月一鉤明浮蹤江漢身難定歸臥湖山夢亦清卻憶綿袍數知己楚天雲樹武昌城

史善長

字春林山陰人官江西餘干知縣著味根山房詩鈔九卷

緝雅堂詩話公仕餘干有異政坐事遣戍烏魯木齊吏民交訟其冤于總督百齡公得請赦歸道江西餘干民驚喜相告至走數百里遮道膜拜立祠以祀著有和宋人方孚若南海襟詠詩一百首輪臺襍記二卷東還紀略一卷公子穆堂先生諱澄籍番禺成道光庚子進士官至右中允左遷編修以母老乞養主講粵秀書院二十三年桐肄業院中曾著門籍附書仕履用志心藏

送伊墨卿太守歸閩

此鄉誰信獨長貧撫字心勞吏自循遷客從來多傑士

聖朝畢竟重儒臣霜飛初冷湖西月日暖重回嶺北春父老攀轅留不得祇憑白水饒行塵

勤修治譜爲蒼生國論於今有定評已分短衣隨李廣忽頒溫綽比劉清界連甌越舟車便囊贖琴書擔荷輕計日蒲輪催北上可容煙水戀鷗盟

酬吳蘭雪見贈二首

天以和聲付鳳鳴
藏園老去讓詩名
仙風搖曳雲璈細
塞雪蒼涼鐵笛橫
一賦迎鑾官七品
三回騎鶴袖雙清
宮袍爭似斑衣暖
笑舞花前酒易傾

遭逢萍水便相親
風雅能教意氣真
犢鼻竿頭難免俗
蛾眉鏡裏可如人
陽城署考何妨下
才子生天信有因
共指千秋青史在
商量位置百年身

過玉門憶餘干父老

已拌絕域葬孤魂

恩許餘生入玉門
日暖郊原同放牧
時平榆柳獨成邨
近邊倍覺風雲壯
報

國猶憐齒髮存
料得餘干諸父老
幾回草綠憶王孫

陸

堃

字簡庵蕭山歲貢著青靄居詩存紀游集

陶濬宣曰君爲芝雲先生孫以能書世其家生平篤於志行其爲詩清思絕徑翛然塵外陽湖汪昉評在晁具茨陳無已之閒爽後稿多散佚其女公子手錄存一百餘篇

謁岳鄂王墓

殺卻將軍好議和兩宮何日渡黃河早知君相忘恢復悔把

金環寄九哥

臨安山中

才過餘杭路未分桑陰一徑淡斜曛老鴉坐樹猶嘯雨匹馬行山不礙雲何處圍碁容大隱當年披錦策奇勳出林蒼水知相近已送谿聲到耳聞

陳

象

字雁初新昌人著時愚存草

陶濬宣曰君疏放不羈性嗜酒酒後喜論時事或慷慨悲歌泣下羣目爲狂丁時難遂絕志科舉磊落抑塞之

氣益吐之於詩咸豐十一年賊陷新昌耳君名迫授僞
官不屈幾遇害久之得脫匿山中縱酒自放以壽終於
家

謁先忠烈公祠七首

公諱聖咸淳進士僉判處州
值宋室傾危以憂卒 錄四

枯蒼花判吏如仙生氣於今尙凜然一片臣心盟白水千秋
史筆重青田劉文成爲
公作傳憂民憂國成孤憤全受全歸卽大賢
應似長沙悲鵬鳥治安莫奏誤英年

干戈滿地陣雲環耿耿孤忠血淚殷生不永年追武穆歿留
正氣與文山劉傳擬之
文山疊山煙塵北道無全壘鎧火西湖且半閒
抱負如公拌殉國中朝孰與濟時艱

青衫司馬說江州難得循良似太邱天向枯蒼支半壁家傳
忠烈到千秋北征將士蟲沙幻南渡君臣燕幕愁如此朝廷
空捥腕一官何處賦歸休

風景新亭滿眼非殘山
賸水幾斜暉劫灰大地紅
羊換霜信橫江白雁飛
半刺卑官紆報國一門止
水誓同歸涓埃未答身先
死千載逋臣淚滿衣

俞勳堯

號北屏新昌諸生著北屏詩草

陶潛宣曰君性好施專趨人急仰食者常數十家家以中落處之坦如常游天台雁蕩四明恬蒼之勝足迹徧大江南北詩文豪爽如其人

水簾庵

水繞山圍地紅稀綠暗天
寺深僧貌古客到鳥聲圓
卽景黏花雨飛流碎玉煙
此中眞面目何處問坡仙

胡起銜

號筠坡湯溪歲貢著詆訶草四卷

秋感

手滋九畹蘭馥郁花初吐
柴門久不開清芬溢庭戶
娟娟良

自惜羞與百草伍臭味誰與同惟有汀洲杜

王壽徵

原名斯思字虎生兆杏子錢塘優貢署廣東從化知縣著寄青霞館詩

緝雅堂詩話虎生覃思四部之學藏書尤多其精本余嘗見之細書校勘幾徧卷內字體秀勁暮年尤工遠似文甫田近學翁復初惜浮湛一官志不得達令子子展司馬與吾友張延秋有連嗜書好古雅才也

湘鄉中丞蔣公被劫去官詩以志感

無端赤舌竟燒城塊磊填胷酒漫傾起滅任教噓蜃氣官私誰復辨鼃聲花開蔣徑香原別月滿揚州色不明莫道卑官多膽薄有觀且作不平鳴

畢兆淇

字蕉盦歸安歲貢箸小石蒲齋詩刪

寄嚴士竹

咫尺鷗波路思君不見君共誰商冷句於我久離羣把酒尋今雨停琴憶暮雲何當艤歸櫂好與細論文

君才何卓犖風義式如金偶展懷人句重教竟夕吟
臭蘭誠有味拜竹詎無心忽送飛鴻去憑他寄好音

伍

珣

原名瑞號少峰湯溪廩生

秋日大觀臺書感

江天空一覽落日此登臺
秋苑迷衰草寒潮鬱怒雷
望吳生古怨隔岸莽飛埃
忠孝慚家世茫茫百感來

兩浙輶軒續錄卷三十三